

# यीशु मसीहना खुशियालीता खबर - यूहन्नाना बयान

- 1 दूनियाता घडे मायान-मुन्नेटाल ओल मत्तोल  
बोन "वचन" इन्दातोड़।  
वचन परमेश्वर्त-संगने मत्तोल  
अनि वचन परमेश्वर मत्तोल।
- 2 ओल मुन्नेटाल परमेश्वर्त-संगने मत्तोल
- 3 सब कुछ ओना जरिया पैदा आत  
अनि जो कुछ पैदा आता  
ओन-मीचुक बड़ांगे भी पैदा हैल्ले आयो।
- 4 ओन-रोपा जीवन मत्ता  
अनि अद जीवन आदमीड़ा वेर्ची मत्ता।
- 5 वेर्ची सिकाटीते जिगले माईता  
अनि सिकाटी तान नाश हैल्ले केवो।
- 6 परमेश्वर्त-इगाटाल राँहतोल वोडुल वातुल  
ओना पड़ोल यूहन्नाल मत्ता।
- 7 एल गवाही सीयाले वातुल -  
अद वेर्चीता गवाही सीयाले  
कि ओना जरिया सब बिश्वास केवेड़।
- 8 ओल तन्ना अद वेर्ची हैल्ले आयोल,  
परमेश्वर ओन वेर्चीता गवाही सीयाले राँहतुल।
- 9 वचन अद सच्चो वेर्ची मत्तोल  
ओल सब लोगोड़कून वेर्ची सीयातोल,  
ओल दूनियाते वायानवाले मत्तोल।

1.10-23

- 10 दुनिया ओना जरिया घड़े मात अनि ओल दुनियाते मत्तोल  
पर दुनिया ओन हैल्ले पुन्नो।
- 11 ओल तन्वा मुल्कते वातुल  
अनि ओनोड़ लोगोड़ ओन ग्रहण हैल्ले केवोड़।
- 12 पर बोड़ ओन ग्रहण कीतुड़  
ओड़कुन ओल परमेश्वरतोड़ मर्क-मियाहक आसी हन्दाना हक सीतुल—  
ओड़कुन बोड़ ओना पड़ोड़-परों बिश्वास कीयातोड़।
- 13 एड़ नत्तुडाल हैल्ले, मेन्दुडा मरजीताल हैल्ले,  
आदमीना मरजीताल हैल्ले, परमेश्वरताल पैदा आतोड़।
- 14 वचन मेन्दुल येची वासी मा-नड्डूम डेरा कीतुल।  
अम्माट ओना महिमा हूड़तोड़ाम,  
परमेश्वर-दाऊनोल वरोंले मरीना महिमा-त्-लेखा हूड़तोड़ाम—  
ओन-रोपा दया अनि सच्चवाई पूरो मत्ता।
- 15 यूहन्नाल ओना गवाही सीयाले वातुल। ओल चिल्ले मासी इन्दुल :—  
एल ओले आन्दुल बोन-हिन्नाल अन्ना इन्जीतोना  
ओल ना-पिज्जा वाईतोल, ना-से फड़ोल आन्दुल,  
बाड़ीकि ना-मुन्ने मत्तोल।
- 16 ओना पूरो दयाताल माकुन आशीषु-परों आशीष पुटता।
- 17 मूसाना जरियाते धर्मता कानून वात,  
पर दया अनि सच्चवाई यीशु मसीहना जरियाते वात।
- 18 परमेश्वरतुन बोले बप्पोड़े हैल्ले हूड़ोल—  
परमेश्वरतोल वड़ोले मरी बोल परमेश्वरु-संग् मन्दातोल,  
ओल ओन उजागर कीतोल।
- 19 इद यूहन्नाना गवाही आन्दः—

यरूशालेम शहरतोड़ यहूदीड़ यूहन्नानु-करूम याजकोड़कुन अनि ओड़ोड़  
संग् सेवा कीयानवालेड़ लेवी लोगोड़कुन इद पूछे कीयाले रॉहतुड़ कि इम्मा बोनी  
आन्दी? 20 ते ओल जवाब सीयाना इन्कार हैल्ले केवोल पर खुलासो माने कीतुल कि  
अन्ना मसीहना हैल्ले आयोन। 21 ओड़ ओंडे पूछे कीतुड़ः— फिर बोनी— बड़ांग्  
इम्मा एलियाहनी आन्दी? ओल इत्तुलः— हैल्ले। ते बड़ांग्, इम्मा नबीनी आन्दी?  
ओल जवाब सीतुलः— हैल्ले। 22 ओड़ ओंडे पूछे कीतुड़ः— इम्मा बोनी? अम्माट  
मावोड़ रॉहतानवालेड़कुन बाहून जवाब सीकोम, इम्मा नी-हिन्नाल बड़ांग्  
इन्दातोनी? 23 ओल यशायाह नबीना मान्दी येची इत्तुलः—

अन्ना डॉन्गूडे ईहून हांक सीयानवालेना लेंग आन्दान,  
कि "प्रभुना सर्री तैयार कीम्ट"।

24 ओड़ फरीसीड़ा-खाकनाल। वासी मत्तोड़ 25 अनि ओंडे पूछे कीतुड़:- इम्मा मसीहनी हैल्ले, एलियाहनी हैल्ले, नबीनी भी हैल्ले, ते बप्तिस्मा<sup>2</sup> बाड़ी सीयातोनी?  
26 यूहन्नाल जवाब सीतुल :- अन्ना येते बप्तिस्मा सीयातोना, पर मी-नड्डूम नित्तोल वोड़ुल आन्दुल बोन इम्माट हैल्ले पुनवीट। 27 एल ना-पिज्जा वाईतोल, ओना शरपूहकनुंग् टंडान-लायोक अन्ना हैल्ले आयोन।

28 इव मान्दींग् बैतनियाह नाटेने यरदन ढोडात्-हवाड़ी आतुंग्, बेगा यूहन्नाल बप्तिस्मा सीन्दुल।

29 दूसरो दिया यूहन्नाल यीशुन ओन करूम वानाके हूड़तुल, अनि इत्तुल:- हूडाट, परमेश्वरता भेंडी-पिल्ला<sup>3</sup>, एल दुनियाता पाप तहची वोईतोल।  
30 ओन-हिन्नाल अन्ना ईहन इत्तान कि ना-पिज्जा वाईतोल ओल ना-से फड़ोल आन्दुल बाड़ीकि ओल ना-मुन्ने मत्तोल। 31 अन्ना ओन हैल्ले पुन्नोन पर इस्राएल-परों<sup>4</sup> ओना उजागर आयान-हिन्नाल अन्ना येते बप्तिस्मा सीनाके वातोना।

32 यूहन्ना गवाही सीनाके इत्तुल:- अन्ना पवित्र आत्मातुन कबूतर्त-लेका आगासदीपताल रगसोड़े अनि ओन-परों ठहरे मासोड़े हूड़तोना। 33 अनि अन्ना ओन हैल्ले पुन्नोन पर बोल नाकुन येते बप्तिस्मा सीयाले रॉहतुल ओल नाकुन इत्तुल कि बोन-परों पवित्र आत्मातुन रगसोड़े अनि ठहरे मासोड़े हूड़की ओल पवित्र आत्माता बप्तिस्मा सीयानवाले आन्दुल। 34 आहुन हूड़तोना अनि मीकुन इन्दातोना कि एले परमेश्वरतोल मरीं आन्दुल।

35 दूसरो दिया यूहन्नाल अनि रंड चेलालोड़ फिर अग्गा नित्ची मत्तोड़।  
36 ओल यीशुन वलीसोड़े हूड़सी इत्तुल:- हूडाट, परमेश्वरता भेंडी-पिल्लाल।  
37 रंटे चेलालोड़ इद केन्ची यीशुन-पिज्जा ताकी लातुड़। 38 यीशु मलसी ओड़कुन वानाके हूड़सी इत्तुल:- बडांग् पिड़कीतोड़ीट? ओड़ ओन इत्तुड़:- रब्बीनी, (याने "गुरू") इम्मा बेगा मन्दातोनी?

39 ओल ओड़कुन इत्तुल:- दट ते हूड़कीट। ओड़ वासी ओना मन्दाना जगा हूड़तुड़ अनि ओन-इग्गा अद दिया मन्दुड़ बाड़ीकि इद अन्दाजन तीसरो पहर आसी हत।

टीका : 1. फरीसीड़ा = यहूदीड़ा धर्मतोड़ सख्त माने कीयानवालेड।

2. बप्तिस्मा = येता संस्कार कीसी बोनई धर्मते मिले कीयाना।

3. भेंडी-पिल्ला = यहूदीड़ा धर्मते पाप मिटे कीयाले भेंडी-पिल्ला बलिदानते तरुहचीं सीन्दुड़।

4. इस्राएल = यहूदीड़ा दूसरो पड़ोल।

40 यूहन्नाना केन्ची यीशुन-पिज्जा ताकसीतोड़ रंटे चेलालोड़ते वोड़ुना पड़ोल आन्द्रीयास मत्ता। ओल शमोन पतरसनोल तम्मुर मत्तोल। 41 ओल मुन्ने तन्वोल भाई शमोनतुन पिड़कसी इत्तुलः— माकुन मसीह (याने खिस्तुस) पुटसी हत्तोल। 42 आन्द्रीयास ओन यीशुन-करूम अवसूहत्तुल। यीशु ओन हूड़सी इत्तुलः— इम्मा शमोननी, नीवा दाऊना पड़ोल भी यूहन्ना आन्द, नीवा पड़ोल केफा ताकल।

43 दूसरी दिया यीशु गलील देशते हन्दा आन्दुल। ओन फिल्लिप्पुस पुटतुल ते ओन इत्तुलः— ना-संगने वड़ा। 44 फिल्लिप्पुस बेथसैदा नाटेनोल मत्तोल, अनि आन्द्रीयास अनि पतरस भी अद नाटेनोड़ मत्तोड़। 45 फिल्लिप्पुस नतनएलतुन पिड़कसी इत्तुलः— बोना मान्दी मूसाल धर्मता कानूनते अनि नबीड़ भी लिखे कीतुड़ ओल माकुन पुटसी हत्तोल। 46 ओल नासरत-नाटेनोल यीशु, यूसफतोल मरीं आन्दुल। नतनएल इत्तुलः— बाड़ी, नासरत-नाटेनाल बड़ांगे अस्सल पसीवल? फिल्लिप्पुस इत्तुलः— दट, हूड़की।

47 यीशु नतनएलतुन वानाके हूड़तुल ते ओन-हिन्नाल इत्तुलः— हूड़ाट, एल सच्चोल इसराएली आन्दुल, ओन-रोपा लन्द-फन्द हैल्ले। 48 नतनएल ओन इत्तुलः— इम्मा नाकुन बेगाटाल पुन्दातोनी? यीशु जवाब सीतुलः— फिल्लिप्पुसना नीकुन केयान-मुन्ने इम्मा तोयामड़ात्-सिर मत्तोनी अद्रा अन्ना नीकुन हूड़तान। 49 नतनएल ओन जवाब सीतुलः— रब्बीनी, इम्मा परमेश्वरतोल मरींनी आन्दी, इम्मा इसराएलनोल राजानी आन्दी। 50 यीशु ओन जवाब सीतुलः— अन्ना नीकुन इत्तोना कि तोयामड़ात्-सिर हूड़तान इदके इम्मा बिश्वास कीयातोनी? इददेनसे फड़ा काम हूड़की। 51 अनि ओंडे इत्तुलः— अन्ना नीकुन सच्चो इन्दातोना, इम्माट आगासदीपतुन खुल्लो अनि परमेश्वरतोड़ दूत्कुन बनिआदमनोल मरींन्-परों तरगसोड़ रगसोड़े हूड़कीट।

रंड दियांग् पिज्जा गलीलता काना नाटेने मड़मिंग् मत्ता। 2 यीशुना दाई 2 अग्गा मत्ता। मड़मिंग्ने यीशु अनि चेलालोड़ भी वर्तालोड़ मत्तोड़। 3 अंगुडा रस माड़सी हत ते यीशुना दाई ओन इन्दा लातः— ओड़-करूम अंगुडा रस हैल्ले 4 यीशु तान इत्तुलः— दाईनी, नाकुन बाड़ी इन्दातोनी? नावा वख्त इन्गा हैल्ले वायो। 5 दाई नौकरकुन इतः— मीकुन वन्कानुल आहने कीम्ट। 6 अग्गा यहूदीड़ा शुद्धिता रीति-रिवाज्त्-हिन्नाल रहक-मुहक मन येरवाले टॉन्गीतांग् सारुंग् सोड़ांग् मत्तान्ग्। 7 यीशु इत्तुलः— सोड़ांग्ने येर निहची सीम्ट। ते सोड़ानुंग् लबालब येर निहची सीतुड़। 8 ओल ओड़कुन इत्तुलः— इंगा तोरसी मड़मिंगनोल मुख्यान सीम्ट।

ओड़ तोरसी सीतुड़। 9 मड़मिंगनोल मुख्याल अद येतुन उन्दतुल अद इन्गा अंगुडा रस बने मासीता, अनि ओल पुन्नोल हैल्ले कि बेगाटाल वाता 10 पर तोरानवालेड़ पुत्तोड़। ते मुख्याल नौड़ान केईसूहची इत्तुलः— चॉकको अंगुडा रस मुन्ने सीयातोड़ अनि सबना खूब उन्दान-पिज्जा मदो सीयातोड़, पर इम्मा इन्गा-लुगुस चॉकको रस इरतोनी। 11 आहन यीशु गलीलता काना नाटेने इद पहिलो चिन्ह दीसूहची तन्वा महिमा उजागर कीतुल, अनि ओनोड़ चेलालोड़ ओन-परो बिश्वास कीतुड़।

12 तेन पिज्जा ओल अनि ओना दाई, ओनोड़ भाईड़ अनि चेलालोड़ कफरनाहूम नाटेने हन्जी थोड़ो दियांग् अग्गा मन्दुड़।

13 यहूदीड़ा फसह-तेवहार्त-मुन्ने यीशु यरूशालेम शहरते हत्तुल। 14 अग्गा ओल कौंदा भेंडा अनि कबूतर ममानवालेड़कन अनि साहूकाहकन मन्दित्-रोपा हूड़तुल। 15 नोनेता कोर्ला बने कीसी सब कौंदानुंग् अनि भेंडानुंग् बाहरो कीतुल अनि साहूकाहकना रूप्यांग-पैसांग् रीकसी वाटतुल। 16 कबूतर ममानवालेड़कन इत्तुलः— इव्वेनुंग् बाहरो वोम्ट — नावोल दाऊना रोतुन बाजाडा रोन मिनी बने केमाट। 17 चेलालोड़कन शास्त्रता इद मान्दी याद वात किः—

“नीवा मन्दिरता प्रेम ना-रोपा किस्तु-लेखा करवीता”

18 यहूदीड़ ओन इत्तुड़ः— इम्मा ईहन कीयाना अधिकारत्-हिन्नाल बदसो चिन्ह दीसूहतातोनी? 19 यीशु ओड़कन जवाब सीतुलः— इद मन्दिरतुन नाश कीम्ट अनि अन्ना मून्द दियाने अद्देन ओंडे तेहका। 20 यहूदीड़ इत्तुड़ः— इद मन्दिरतुन तेहना-तेहनाके रंड-वीसांग् सारुंग् वशांग् लागतुंग्, इम्मा मून्द दियाने बाहन तेहकी? 21 पर ओल तन्वा मेन्दुडा मन्दिरता मान्दी कीन्दुल। 22 ओना सासी तेदान-पिज्जा चेलालोड़कन याद वात कि ईहन वन्कसी मत्तोल अनि ओड़ शास्त्रत्-परो अनि यीशुना मान्दीत्-परो बिश्वास कीतुड़।

23 फसह-तेवहारता वक्त ओल येरूशालेम शहरते मत्तोल अनि लईसोड़ ओना अजीब काम्कनुंग् हूडसी ओन-परो बिश्वास कीन्दुड़। 24 पर यीशु ओड़ा भरोसाते हैल्ले मन्नोल बाडीकि ओल सब लोगोड़कन पुन्दुल। 25 इद्देना जरूरत हैल्ले मन्नो कि बोले ओन बड़ांगे बते केवेल, ओल पुन्दुल कि लोगोड़ा जीवाते बड़ांग् आईता।

यहूदीड़ोल वोड़ुल मुख्याल निकूदेमुस पड़ोडोल फरीसी मत्तोल 2 एल 3 नरका यीशुन्-करूम वासी इत्तुलः— रब्बीनी, अम्माट पुत्तोड़ाम कि इम्मा परमेश्वरता खाकनाल वासी गुरूनी आन्दी बाडीकि इम्मा आहन चिन्ह दीसूहतातोनी, परमेश्वर संगने हैल्ले मन्नेल ते आहन चिन्ह दीसूहताना हैल्ले बने मायो। 3 यीशु ओन जवाब सीतुलः—

अन्ना नीकून सच्चो इन्दातोना, पर्रोटाल फिर पैदा आयान-मीचुक बोले परमेश्वरता राजते हैल्ले वायो। 4 निकुदेमुस ओन इत्तुलः— सेनाल आसी बोले बबाह पैदा आयानुल? दाईना पीटे दूसरो मेला सोड़िसीकून बाहन पैदा आयेल? 5 यीशु ओन जवाब सीतुलः—

अन्ना नीकून सच्चो इन्दातोना, येताल अनि आत्माताल पैदा आयान-मीचुक बोले परमेश्वरता राजते हैल्ले सोड़ीयोल। 6 मेन्दुडाल पैदा आईता अद मेन्दुल आन्द, अनि आत्माताल पैदा आईता अद आत्मा आन्द। 7 नावा इद मान्दीत्-हिन्नाल अचम्भा मिनी केमा कि पर्रोटाल फिर पैदा आयाना जरूरी आन्द। 8 वड़ी बेक्के हन्दा आईता हक्के वड़ीस्ताता, अनि इम्मा ताना लेंग केन्जीतोनी पर बेगाटाल वाईता अनि बेक्के वड़ीस्ताता हैल्ले पुनवी, बोले आत्माताल पैदा आईतोल ते ईहने आन्दुल। 9 निकुदेमुस जवाब सीसी इत्तुलः— इव मान्दींग् बबाह आयानुंग्? 10 यीशु ओन जवाब सीतुलः—

इम्मा इसराएल्कनोल फडोल गुरूनी आन्दी अनि इव मान्दीनुंग् समझे हैल्ले माईवी? 11 अन्ना सच्चो इन्दातोना, अम्माट पुत्तोडाम अद्देना मान्दी वन्कीतोडाम अनि हूडतोडाम तान वेहतातोडाम, अनि इम्माट मावा माने हैल्ले केवीट। 12 अन्ना मीकून दुनियाता मान्दी इत्तान अनि इम्माट भरोसा हैल्ले केवीट ते आगासदीपता मान्दी इन्दाका ते बबाह भरोसा कीकीट? 13 आगासदीपते बोले हैल्ले हन्नोल वडोले बनिआदमनोल मरीं आगासदीपताल रगतोल अनि आगासदीपते मन्दातोल। 14 बाहन मूसा डॉन्गूडे ताड़ाशतून पर्रो तरूहतूल जरूरी आन्द कि बनिआदमनोल मरींन तरूहतानुड 15 कि बोल ओन-पर्रो बिश्वास कीयातोल हमेशा-लुगूस पिस्सानुल।

16 बाड़ीकि परमेश्वर दुनियातून ईहन प्रेम कीतुल कि तन्वोल वर्रोले मरीं सीतुल कि बोल ओन-पर्रो बिश्वास कीयातोल नाश हैल्ले आयोल पर हमेशा-लुगूस पिस्सानुल। 17 परमेश्वर तन्वोल मरींन दुनियातून दोषी ठहरे कीयाले हैल्ले, पर पिस्सूहताले रॉहची सीतुल। 18 बोल ओन-पर्रो बिश्वास कीयातोल ओन-पर्रो दोष हैल्ले आयो, पर बोल बिश्वास हैल्ले केवोल मुन्नेटाल एल दोशी आतोल तेन-हिन्नाल कि परमेश्वरतोल वर्रोले मरींन्-पर्रो बिश्वास हैल्ले केवोल। 19 दोष इद आन्द कि वेर्ची दुनियाते वाता अनि ओड़ सिकाटीतून वेर्चीत्-से मइसी प्रेम कीतुल तेन-हिन्नाल कि ओड़ा काम्क ब्रोंगु आन्दुंग्। 20 ब्रों काम कीयानवालेड वेर्चीतून पास्कीतोड अनि वेर्चीते हैल्ले वायोड कि ओड़ा काम्क-पर्रो दोश हैल्ले लागवल। 21 पर सच्चाई कीयानवाले वेर्चीते वाईतोल कि ओना काम्क उजागर आईवांगु कि परमेश्वरता खाकनाल आईतांगु।

22 तेन-पिज्जा यीशु अनि चेलालोड यहूदिया देशते वातुड अनि ओल अग्गा ओड-संगने मन्जी लोगोडकून बप्तिस्मा सीन्दुल। 23 यूहन्नाल भी शालेम नाटेन्-करूम एनोन पडोडा जगाते बप्तिस्मा सीन्दुल बाडीकि अग्गा वल्ले येर मत्ता अनि लोग वासी बप्तिस्मा येन्दुड। 24 यूहन्नाल अद वकत-लुगुस जेलखानाते हैल्ले वायोल। 25 यूहन्नानोड चेलालोड बोले यहूदीन्-संगु शद्धिन्-हिन्नाल बहस कीन्दुड। 26 ओड यूहन्नान्-करूम वासी इत्तुड: ये रब्बीनी, यरदन ढोडात्-हवाडी नी-संगने मत्तोल बोन-हिन्नाल इम्मा वेहची सीती, हूडा, ओल भी बप्तिस्मा सीयातोल, अनि ओन-करूम सब हन्दातोड। 27 यूहन्नाल जवाब सीतुल:— परमेश्वर हैल्ले सेवोल ते बोने बडांगे हैल्ले पुट्टो। 28 इम्माट पुत्तोडीट कि अन्ना इत्तान कि अन्ना मसीहना हैल्ले पर ओन-मुन्ने रॉहतल वातोना। 29 ओन-हिन्नाल नावा आहन पूरो खुशी आन्द बाहन मडमिंगने नौडानोल दोस्तना खुशी आईता। नौडी तो नौडाना आन्द, पर नौडानोल दोस्त भी ओना लेंगु केन्चीकून फडा खुश आईतोल — नाकून भी ईहन खुशी पार पुट्टी हत। 30 ओना बडे मायाना अनि नावा घटे मायाना जरूरी आन्द

31 आगासदीपताल बोल वाईतोल ओल सबसे मैसी आन्दुल। बोल धरतीताल वाईतोल ओल धरतीतोल आन्दुल अनि धरतीता मान्दी वन्कीतोल 32 बोल परमेश्वरताल वातोल ओल सबसे मैसी आन्दुल। बडांगु हूडतोल अनि बडांगु केन्जतोल इद्देन वेहतातोल अनि बोडे ओना हैल्ले माने केवोड। 33 बोले ओना माने केवेल ते आहन माने कीयातोल कि परमेश्वर सच्चोल आन्दुल। 34 बाडीकि बोन परमेश्वर रॉहची सीतोल ओले परमेश्वरता मान्दी वन्कीतोल बाडीकि परमेश्वर ओन तन्वा आत्मा भरपूरीताल सीयातोल। 35 दाऊहडाल मरीन प्रेम कीयातोल अनि ओना कैदे सब कुछ सीतोल। बोल परमेश्वरतोल मरीन्-परों बिश्वास कीयातोल हमेशाता जीवन ओना अन्द, पर बोल मरीना मान्दी हैल्ले माने केवोल ओल बप्पोडे अद जीवन हैल्ले हूडोल पर परमेश्वरता सजा ओन-परों वासी मन्दाता।

फरीसीड केन्जतुड कि यूहन्नान्-से मईसी यीशु चेलालोड बने कीसी 4 बप्तिस्मा सीयातोल। 2 (पर यीशु तना बप्तिस्मा हैल्ले सेवोल, ओनोड चेलालोड सीन्दुड)। 3 फरीसीडा इद मान्दी पुन्जी यीशु यहूदिया देशतून छोडे कीसी गलील देशते ओडे मलसी हत्तुल। 4 सामरीया देशतु-रोपाटाल पसीसी हन्दा अर्त। 5 हन्ना-हन्नाके सामरीया देशता बद्दे शहरते वातुल। शहरता पडोल साईखार मत्ता अग्गा जुन्नो जमानाते याकूब तन्वोल मरीं यूसुफतून नेली सीसी मत्तोल अद नेली करूम मत्ता अनि याकूबना क्वा भी अग्गा मत्ता। 6 यीशु ताकना-ताकनाके दासीकून क्वात्-करूम उदसी हत्तुल। 7 द्वाडीता झोक मत्ता। इचोडे येर निहता सामरी माई वात, ते यीशु तान इत्तुल:— नाकून येर उहच्ची सीम। 8 चेलालोड

शहरते साडींग् तत्ताले हन्जी मत्तोड़। 9 माई ओन इतः— अन्ना तो सामरीना आन्दान अनि इम्मा यहूदी आसी ना-से येर बबाह तलेहकीतोनी? (बाड़ीकि यहूदीइ सामरीड़ा-संग् बद्दे भी व्यवहार हैल्ले केवोड़)। 10 यीशु तान जवाब सीतुलः— इम्मा परमेश्वरता दान पुन्नेनी अनि येर बोल तलेहकीतोल इद भी पुन्नेनी ते इम्मा जीवनता येर तलेहकेनी अनि नीकून प्टवल। 11 माई ओन इतः— ये दादानी, नी-करूम येर निहताले बडांगे हैल्ले अनि क्आ गहरो आन्द, इद जीवनता येर नी-करूम बेगाटाल वाता? 12 ते बडांग् इम्मा मावोल दाऊ याकूबसे मईसी आन्दी, ओल माकून इद क्आ सीतुल अनि ओल भी अनि ओनोड़ मर्क उन्दुड़ अनि ओना ढोर्क भी उन्दुंग्। 13 यीशु तान जवाब सीतुलः— बोले इद येर उन्नेल ते ओन्डे येर वडेकानुल। 14 पर अन्ना ईताल येर सीका कि बोले उन्नेल ते ओन्डे येर हैल्ले वडेकोल। ईताल येर अन्ना सीका अद उन्दानवालेन्-रोपा हमेशाता जीवनत्-हिन्नाल पोन्गता सोता आसी दल। 15 माई इतः— ये दादानी, इद येर नाकून सीम कि ओन्डे येर हैल्ले वडेकोन अनि येर निहताले इच्चो लक हिकके हल्ले वायोन। 16 यीशु तान इत्तुलः— हन, नीवोल मईदोन इग्गा केईसी तड़ा। 17 माई जवाब सीसी इतः— नावोल मईदोल तो बोले हैले। यीशु इत्तुलः— इम्मा खूब इन्दातोनी कि नावोल मईदोल बोले हैले। 18 बाड़ीकि नीवोड़ सयंग् मईदोड़ आतोड़ अनि बोन-संगने इन्गा मन्दातोनी ओल नीवोल मईदोल हैल्ले आयोल — इद इम्मा सच इत्तोनी। 19 माई ओन इतः— ये दादानी, नाकून ईहन अड़े माइता कि इम्मा नबी आन्दी। 20 मावोड़ पुर्खालोड़ इद मट्टाते परमेश्वरता भक्ति कीन्दुड़ अनि इम्माट इन्दातोड़ीट कि भक्ति कीयाना ठीक जगा यरूशालेम शहरते आन्द। 21 यीशु इत्तुलः—

ये माईनी, नावा मान्दी सच माने कीम,  
ईहन घड़ी वाईता कि परमेश्वरता भक्ति इद मट्टाते भी हैल्ले  
अनि यरूशालेमते भी हैल्ले केवीट।

22 इम्माट बोना भक्ति कीयातोड़ीट ओन पुनवीट हैल्ले,  
अम्माट प्ततोड़ाम कि बोना भक्ति कीयातोड़ाम  
बाड़ीकि छटकारा यहूदिड़ा-नड्डमटाल वाईता।

23 ईहन घड़ी वाईता अनि इन्गा वाता भी  
कि परमेश्वरतोल आत्माना शक्तिते  
ओना मर्जीत्-लेखा ओना सच्चो भक्ति कीयानुड़।

24 परमेश्वर आत्मा आन्दल,  
ओना सच्चो भक्ति वरई ओनोल आत्माना शक्तिते आईता।



25 माई ओन इतः— अन्ना पुत्तोना कि मसीह (याने खिस्तुस) वायानुल अनि ओना वायान-पर्रो ओल इव सब मान्दीनुंग् माकून वेहतानुल। 26 यीशु तान इत्तुलः—

नी-संगने मान्दी कीयातोना, अन्ना ओले आन्दान।

27 इच्चोडे ओनोड़ चेलालोड़ वातुड़ अनि अचम्भा कीया लातुड़ कि ओल माईन्से मान्दी कीयातोल पर बोले तानसे हैल्ले वन्कोल कि बड़ांग् चाहे माईतोनी? या ओनसे हैल्ले पूछे केवोल कि बाड़ी तानसे मान्दी कीयातोनी? 28 माई सोरा छोड़े कीसी शहरते मलसी हत अनि अग्गावालेड़कून इन्दा लातः— वड़ाट, वोड़न हूड़ाट, अन्ना बड़ांग् बड़ांग् कीतोना सब नाकून वेहची सीतुल। 29 एले मसीह आन्दुल कि बाह? 30 ओड़ शहरताल पसीसी ओन करूम वाई लातुड़। 31 इच्चोडे चेलालोड़ ओन इत्तुड़ः— गुरूनी, चुड़डोसो तिन्जी येना। 32 पर ओल ओड़कून इत्तुलः—

ना-करूम ईताल साड़ी आन्द अद्देन इम्माट हैल्ले पुनवीट।

33 चेलालोड़ आपुसते इन्दा लातुड़ः— बोले ओन-करूम साड़ी तत्तोल कि बाह?  
34 यीशु ओड़कून इत्तुलः—

नावोल रॉहतानवालेना मर्जीत्-पर्रो ताकाना  
अनि ओना काम पूरो कीयाना  
इद ना-हिन्नाल साड़ीत्-लेखा आन्द।

35 इम्माट ईहून इन्दातोड़ीट कि हैल्ले,  
ओन्डे नालुंग् माहिनांग् अनि कोइयानुड़।  
अन्ना मीकून इन्दातोनाः— नेल्कनुंग् हूड़ाट-  
इन्गाई कोयीले पन्डसी हत्तांग्।

36 कोयानवालेन बन्नी पुट्टिता  
ओल हमेशाता जीवन्त्-हिन्नाल फस्सल अर्पा कीयातोल  
अनि वीतानवाले अनि कोयानवाले रटे खुश आयानुड़।

37 आहुने इद मान्दी सच आईता  
कि वोड़ल वीतीतोल अनि दूसरोल कौयीतोल।

38 इम्माट मुन्नेटाल मिहनत हैल्ले केवीट  
ईताल जगाते मीकून कोयीले रॉहतान —  
दूसरोड़ मिहनत कीतोड़  
अनि मीकून ओड़ा मिहनतना फायदा पुटता।

39 अद शहरतोड़ लई सामरीड़ माईना मान्दीत्-हिन्नाल ओन-परो बिश्वास कीतुड़ बाड़ीकि अद इहन इन्जी मत्ता कि बड़ांग् बड़ांग् अन्ना कीतान अद सब नाकून वेहची सीतुल। 40 सामरीड़ ओन-करूम वासी अरदास कीतुड़ कि मा-इग्गा मन्दाकी ते ओल रंड दियांग् मन्दुल। 41 ओना मान्दीत्-हिन्नाल ओंडे वल्लेसोड़ बिश्वास कीतुड़। 42 एड़ अद माईन इन्दुड़:- इन्गा बिश्वास कीयातोड़ाम नीवा मान्दीत्-हिन्नाल हैल्ले पर अम्माट खुद केन्जतोड़ाम अनि पुत्तोड़ाम कि एल सचमुच दनियातोल पिस्सूहतानवाले आन्दुल।

43 रंड दियांग्-पिज्जा ओल अग्गाटाल पसीसी गलील-देशते हत्तुल। 44 यीशु तन्ना इन्जी मत्तोल कि तन्वा देशते नबीना इज्जत हैल्ले आयो। 45 पर गलीलते अवतुल ते गलीलीड़ खुश आसी ओन ग्रहण कीन्दुड़ बाड़ीकि ओड़ ओना सब काम्कनुंग् यरूशालेमता तेवहारते हूडसीतोड़, ओड़ भी अद तेवहारते हन्जी मत्तोड़।

46 ओल ओन्डे गलीलता काना-नाटेने वातुल, अग्गा ओल येतुन अन्गुडा रस बने कीसी मत्तोल। 47 बोले दरोगानोल मरीं कफरनाहूम-शहरते खूब बीमार आसी सायान-लायोक मत्तोल। 48 दरोगाल केन्जतुल कि यीशु यहूदिया-देशताल गलीलते मलसी वातोल, ते ओल यीशुन्-करूम वासी अरदास कीतुल कि नावा रोन वासी नावोल मरींन चंगो कीम। 49 इद्देन-परो यीशु ओन इत्तुल:- इम्माट चिन्ह हूडान-मीचुक बिश्वास बप्पोड़े हैल्ले केवीठ। 50 दरोगाल इत्तुल:- महाराजनी, नावोल मरींना सायान-मुन्ने वड़ा। यीशु इत्तुल:- हन, नीवोल मरीं पिस्सीतोल। दरोगाल यीशुना इद मान्दीत्-परो भरोसा कीसी रोन मलसी हत्तुल। 51 हन्ना-हन्नाके ओनोड़ नौकक ओनसे मिले मासी इत्तुड़:- तूडाल पिस्सीतोल। 52 ओल ओड़कून पूछे कीतुल कि ओना अड़की बप्पोड़ रगसी हत। ओड़ ओन इत्तुड़:- दुपाड़ीते अड़की रगसी हत। 53 अनि दरोगाल पुत्तुल कि यीशु नाकून इन्जी मत्तोल कि नीवोल मरीं पिस्सीतोल अद्दे घड़ी मत्ता। अनि ओल अनि ओनोड़ रोन-मेटोड़ सब बिश्वास कीतुड़। 54 यहूदियाताल पसीसी अनि गलीलते वासी यीशुना इद दूसरो चिन्ह आसी मत्ता।

तेन-पिज्जा यहूदिडा तेवहार मत्ता अनि यीशु यरूशालेमते मलसी  
**5** हत्तुल।

2 यरूशालेमता भेड़ पड़ोडा डेहड़ीत्-करूम कुंड आन्द। ताना पड़ोल यहूदिडा पारसीते बेतहसदा आन्द। 3 अद्देना सयुंग् छपड़ींग् मन्दुंग्। 4 छपड़ींग्ने लईसोड़ बीमार्क, अन्धालोड़, लंगडालोड़ अनि वत्ता मेन्दुलवालेड़ मन्दुड़। 5 अग्गा वोडुल

टीका :

1. लोगोड़ा आहन बिश्वास मत्ता कि बापोड़े बापोड़े परमेश्वरतोल दन वासी येते हिन्कोरा कीन्दुन अनि योस बीमार येते पहलो रगगी हन्दुल ओल नेडती हन्दुल।

मत्तोल एल रंड-वीसांगुने रंड कम साल्कनाल बीमार मत्तोल। 6 यीशु ओन हूडसी पुत्तुल कि एल वल्ले दियांगुनाल आहून आन्दुल अनि ओन पूछे कीतुल:-

7 नेंडा आईतोनी कि बाह? बीमारीवाले इत्तुल:- महाराज, येता हिल्कोरा वाईता अनि नाकून येते रगस्ताले बोले नाकरूम हैल्ले, नावा रगनाके दूसरोल ना-मुन्ने रगसी हन्दातोल। 8 यीशु ओन इत्तुल:- तेदा, नीवा बिछौना तहची ताका। ओल पडकने नेंडपी बिछौना तहची ताकी लातुल। 9 इद सनीचरत्-नेटी आसी हत।।

10 बोल आहून नेंडसी मत्तोल यहूदीइ ओन इन्दा लातुइ:- सनीचरत्-नेटी बिछौना तहची ताकाना बेकानून आन्द। 11 ओल जवाब सीतुल:- नाकून नेंडसूहची सीतोल ओल नाकून बिछौना तहची ताकाना इत्तोल। 12 ओइ पूछे कीतुइ:- बिछौना तहची ताका ईहून इत्तुल ओल बोल आन्दुल? 13 पर ओल पुन्नोल हैल्ले कि बोल मत्तोल, बाड़ी कि अद जगाते फड़ा भीड़ लगे मायान-हिन्नाल यीशु अग्गाटाल पसीसी हन्जी मत्तोल। 14 तेन-पिज्जा ओल मन्दिरते यीशुन पुटतुल अनि यीशु ओन इत्तुल:- हूडा, इम्मा नेंडतोनी ते पाप ओण्डे मिनी केमा, कि नी-परों तेनसे फड़ा तकलीफ हैल्ले आईवल। 15 ओल यहूदीइ-करूम हन्जी इत्तुल:- नाकून चाँकको कीतोल ओल यीशु आन्दुल। 16 इद्देन-हिन्नाल यहूदीइ यीशुन तंग कीया लातुइ कि ओल सनीचरत्-नेटी ईताल काम कीन्दुल। 17 तेन-परों यीशु ओइकून इत्तुल:- नावोल दाऊ भी इंगा-लुगुस काम कीयातोल अनि अन्ना भी काम कीयातोना। 18 यहूदीइ ओन जाँककीले ओंडे जगत कीया लातुइ, तेन-हिन्नाल हैल्ले कि सनीचरत्-नेटी ईताल काम कीन्दुल, पर तेन-हिन्नाल भी कि ओल परमेश्वरतुन "दाऊ" इन्जी अपलोतुन परमेश्वरत्-बरोबर बने कीन्दुल।

19 यीशु ओइकून जवाब सीसी इत्तुल:-

अन्ना मीकून सच्चो इन्दातोना

परमेश्वरतोल मरीं आसी अन्ना बडांगे हैल्ले केवोन

दाऊहड़ान बातल काम कीसोडे हूडीतोना

आतल काम कीयातोना।

दाऊ बातल काम कीयातोल मरीं आसी अन्ना भी आहून कीयातोना।

20 दाऊ मरींन प्रेम कीयातोल

जो बडांगे कीयातोल अद सब मरींन वेहतातोल।

टीका:

1. यहूदीइ धरमते सनीचरत्-नेटी बडांगे भी काम कीयाना बेकानून मत्ता, बोड़ीक ओइ सनीचरत्न पवित्र आरामता दिया माने कीन्दुइ।

5.21-30

अनि ओंडे भी फड़ांग् काम्क वेहतानुल

कि इम्माट अचरज कीकीट।

21 बाहुन दाऊ सातालोड़कून जीवा सीसी तहतातोल  
आहुन ओनोल मरीं आसी बोड़कून चाहे माईतोना  
ओड़कून जीवन सीयातोना।

22 दाऊ बोनाई न्याव हैल्ले केवोल  
न्यावता पूरो काम मरींना कैदे सीतोल।

23 तेन-हिन्नाल कि सब लोग बाहुन दाऊना इज्जत कीयातोड़  
आहुन्ने मरींना इज्जत भी केवीड़।  
बोल मरींना इज्जत हैल्ले केवोल  
ओल मरींनोल राँहतानवाले दाऊना इज्जत भी हैल्ले केवोल।

24 अन्ना मीकून सच्चो इन्दातोना  
नावा मान्दी केन्ची नावोल राँहतानवालेन्-परों भरोसा कीयातोल  
हमेशाता जीवन ओना आन्द,  
ओन-परों दोष बप्पोड़े हैल्ले लागो  
पर ओल मौतताल वरसीकून जीवनते अवसी हत्तोल।

25 अन्ना मीकून सच्चो इन्दातोना  
अद घड़ी वाईता, अनि इन्गा भी वासी हत्ता  
कि सातालोड़ परमेश्वरतोल मरींना लेंग केन्जानुड़  
अनि बोड़ केन्जानुड़ ओड़ पिस्सानुड़।

26 बाहुन दाऊ अपलोत्-रोपा जीवन इरींतोल  
आहुन मरींन भी अपलोत्-रोपा जीवन इरीं सीतोल।

27 अनि न्याव कीयाना हक भी नाकून सीतोल  
बाड़ी कि अन्ना बनिआदमनोल मरींना भी आन्दान।

28 तेन-हिन्नाल अचरज मिनी केमाट -  
अद घड़ी वायल कि सब सातालोड़  
नावा लेंग केन्ची पिस्सी तेदानुड़।

29 बोड़ भलो कीतोड़ ओड़ जीवन्त्-हिन्नाल पिस्सी तेदानुड़,  
बोड़ बूरो कीतोड़ ओड़ सज्जात्-हिन्नाल पिस्सी तेदानुड़।

30 नावा खाकनाल अन्ना बड़ांगे हैल्ले केवोन,  
परमेश्वरता खाकनाल केन्जीतोना आहुन न्याव कीयातोना।  
सच्चो न्याव कीयातोना बाड़ी कि नावा मरजीत्-लेका हैल्ले  
पर नावोल राँहतानवालेना मरजीत्-लेखा कीया आईतोना।

- 31 ना-हिन्नाल मान्दी केवेना ते अद मान्दी माने भी हैल्ले केवोड़,  
 32 पर दूसरोल आन्दुल ना-हिन्नाल मान्दी कीयातोल  
 अनि ओल सच्चो वन्कीतोल।
- 33 यूहन्नान्-करूम रॉहचीतोड़ीट अनि ओल सच्चाईत्-हिन्नाल वन्कतुल।  
 34 लोगोड़ा गवाही नाकून जरूरी हैल्ले आयो,  
 मीकून पिस्सूहतालेस्क अन्ना इव मान्दींग् इन्दातोना।
- 35 ओल मास्ता टावडीत्-लेखा वेर्ची सीसी जिगले मान्दुल  
 अनि इम्माट ओना वेर्चीते थोड़ोसो दियांग् खूश आसी मन्दीट।
- 36 पर बव काम्क दाऊ नाकून पूरो कीयाले सीतोल  
 अनि अन्ना इन्गा कीयातोना,  
 इव काम्क यूहन्नासे भी वीरसी गवाही सीयातांग्  
 कि दाऊ नाकून रॉहतोल।
- 37 अनि दाऊ नाकून रॉहतोल ओल भी ना-हिन्नाल गवाही सीतोल।  
 इम्माट बप्पोड़े ओना लेंग हैल्ले केन्जवीट अनि सूरत भी हूड़वीट।
- 39 शास्तरते पिड़कीतोड़ीट बाड़ीकि मीवा ईताल विचार आईता  
 कि शास्तरते मा-हिन्नाल हमेशाता जीवन पृटीता –  
 अनि शास्तरते नावा भी मान्दी आता।
- 40 पर इम्माट जीवनत्-हिन्नाल ना-करूम वाई हैल्ले आइवीट।  
 41 आदमीड़ा खाकनाल नावा तारीफ़ केन्जी हैल्ले आयोन।  
 42 पर अन्ना मीकून पुत्तोना  
 कि मीवा जीवात्-रोपा परमेश्वरता प्रेम हैल्ले आयो।
- 43 अन्ना नावोल दाऊना पड़ोडे वातोना  
 अनि इम्माट नाकून ग्रहण हैल्ले केवीट।  
 अगर तन्वाई पड़ोडे बोले वायेल  
 ओन इम्माट ग्रहण कीकीट।
- 44 इम्माट वोडुल दूसरोना खाकनाल तारीफ़ केन्जी आइतोड़ीट  
 वड़ोले परमेश्वरता खाकनाल तारीफ़ हैल्ले पिड़कवीट,  
 ते इम्माट बबाह बिश्वास कीकीट।
- 45 ईहन विचार मिनी केमाट  
 कि दाऊन्-सामनो एल मसीह माकून दोषी ठहरे कीयानुल –  
 मूसाल। मीकून दोषी ठहरे कीयातोल  
 बोन-पर्रो इम्माट भरोसा इरतोड़ीट

5.46-6.21

46 इम्माट मूसाना मान्दीत्-परों बिश्वास केवेडीट

ते नावा भी मान्दीत्-परों बिश्वास केवेडीट

बाडीकि ओल ना-हिन्नाल लिखे कीतोल

47 पर इम्माट ओना लिखे कीता मान्दीत्-परों बिश्वास हैल्ले केवीट

अनि नावा मान्दीत्-परों बिश्वास बबाह कीकीट?

तेन पिज्जा यीशु गलील देशता समुंदरत्-हवाडी पसीसी हत्तुल (अद  
**6** समुंदरता दूसरो पडोल "तिबीरियासता समुंदर" मत्ता)। 2 बीमारकुन  
नेडस्ताले ओना अजीब काम्कुन हूडसी वल्लेसोड ओन-पिज्जा फडा भीड लगे कीसी  
ताकी लातुड। 3 पर यीशु टेकडीते तरगसी चेलालोडा-संगने अग्गा उदसी हत्तुल।  
4 यहूदिडा फसह-तेवहार करूम मत्ता।

5 यीशु पडा भीड तन्वात्-करूम वासोडे हूडसी फिलिपुसतुन इत्तुल:— ये  
फिलिपुसनी, एडा तिन्दान-हिन्नाल साडींग बेगाटाल ततकट? 6 ओल फिलिपुसतुन  
पखें कीयाले ईहन इन्दुल, तना पुत्तुल कि बडांग् कीका। 7 फिलिपुस जवाब  
सीतुल:— रंड-नूहक रूपयानांग् साडींग् वोडुल वोडुल थोडोसो ही येनेल ते  
मतकोची आयानुंग्। 8 बोले चेलाल, अन्दियास पडोडोल, शमोन-पतरसनोल  
तम्मुर, इत्तुल:— 9 इग्गा तूडाल आन्दुल ओन-करूम सयुंग् साडींग् अनि रंड मीन्क  
आन्दुंग् पर इच्चोड-हिन्नाल इव बडांग् आयानुंग्? 10 यीशु इत्तुल:— लागोडकुन  
उदसूहट। अग्गा वल्ले जाडी मत्ता अनि सब लोग उदसी हत्तुड, अन्दाजन सैयुंग्  
हजारक आदमीड मत्तोड। 11 यीशु साडीनुंग् येतुल अनि परमेश्वरता धन्यवाद  
कीसी उद्दानवालेडकुन साडींग् तूसी सीस्तुल, अनि मीन्कुन भी आहुन्ने कीतुल,  
बच्चोंग् ओडकुन लागतुंग्। 12 सब पंची हत्तुड ते ओल चेलालोडकुन इत्तुल:—  
पिस्तांग् टुकडानुंग् अर्पा कीसी येनाट, बडांगे नाश हल्ले आयो। 13 ओड अर्पा  
कीतुड अनि सैयुंग् साडींग् तिन्दान-पिज्जा बारह वोडिंग्मेंड पिस्तांग् टुकडांग्  
तहतुड। 14 यीशुना इद अजीब काम हूडसी लोगोड इन्दा लातुड:— सचमुच एल  
ओले दुनियाते वायानवाले नबी मतके।

15 यीशु पुत्तुल कि नाकुन राजाल बने कीयाले बैईले आईतोड ते फिर वरोले  
मट्टाते हत्तुल। 16 नुल्पे चेलालोड समुंदरत्-खाक हत्तुड। 17 ड. . . . .ते उदसी  
समुंदर वरसी कफरनाहूम शहरते हन्दुड। नरका आत अनि यीशु ओड-करूम हैल्ले  
मन्नोल। 18 खूब वडीस्ता लात अनि समुंदरते हिल्कोडांग् तेदी लातुंग्।  
19 डॉन्गातुन ताकस्ता ताकस्ताके रंचा कोस हन्दान-पिज्जा ओड यीशुन येत-परों  
ताकनाके डॉन्गात्-करूम वानाके हूडसी वरीसी हत्तुड। 20 पर ओल ओडकुन  
इत्तुल:— वरीमाट, अन्ना आन्दान। 21 फिर ओड ओन डॉन्गाते उदसूहतुड अनि  
बेगा हन्दुड पडकने अग्गा अवसी हत्तुड।

22 सकाड़े समुंद्ररत-हिवाड़ीवालेड़ हूड़तुड़ कि वराई उन्दी डॉन्गा मत्ता अनि यीशु चेलालोड़ा-संगने डॉन्गाते उदसी हैल्ले मन्नोल पर चेलालोड़ वड़ोड़े हन्जी मत्तोड़। 23 पर तिबीरियास शहरताल, अद जगात्-करूम बेगा यीशु धन्यवाद सीसी ओड़कुन तिहता सीसी मत्तोल, डॉन्गांग् वासीतांग्। 24 भीड़तोड़ लोगोड़ हूड़तुड़ कि यीशु हिवके हैल्ले अनि चेलालोड़ भी हैल्ले आयोड़, ते ओड़ इव डॉन्गाने उदसी यीशुन पिड़कसोड़े कफरनाहूमते अवतुड़। 25 समुंद्ररत्-हवाड़ी ओल ओड़कुन पुटतुल अनि ओड़ ओन इत्तुड़:— ये रब्बीनी, इम्मा इग्गा बप्पोड़ वाती? 26 यीशु ओड़कुन जवाब सीतुल:—

अन्ना मीकुन सच सच इन्दातोना,  
इम्माट अजीब चिन्ह हूड़सी नाकुन हैल्ले पिड़कवीट,  
पर तेन-हिन्नाल पिड़कीतोड़ीट कि साडींग् तिन्जी पंची हत्तीट।

27 नाश आयानवाले साडीत्-हिन्नाल फिकर मिनी केमाट।  
पर हमेशाता जीवनत्-हिन्नाल मन्दानवाले साडीता फिकर कीम्ट —  
बनीआदमनोल मरीं मीकुन अद साड़ी सीयानुल,  
बाडीकि ओन-परों दाऊहडाल छाप लगे कीतोल।

28 ओड़ ओन इत्तुड़:— अम्माट परमेश्वरता मर्जीत्-लेका कीयाले बडांग् कीकोम? 29 यीशु ओड़कुन जवाब सीतुल:— परमेश्वरता मर्जी इद्दे आन्द, कि बोन परमेश्वर राँहतोल ओन-परों इम्माट बिश्वास कीम्ट। 30 ओड़ ओन इत्तुड़:— ते इम्मा बदसो अजीब चिन्ह दीसूहतातोनी कि अम्माट हूड़सी नी-परों बिश्वास कीकोम — इम्मा बडांग् कीयातोनी? 31 मावोड़ पुर्खालोड़ । मरूस्थलते मन्ना तिन्दुड़ अनि शास्त्रते ईहून लिखे माता कि

“ओल ओड़कुन आगासदीपताल साडी तिन्दाले सीतुल”।

32 यीशु ओड़कुन इत्तुल:—

अन्ना मीकुन सचो इन्दातोना,  
आगासदीपताल मीकुन अद साड़ी सीतुल ओल मूसाल हैल्ले मन्नोल,  
नावोल दाऊ मीकुन आगासदीपताल सचो साड़ी सीयातोल।

33 परमेश्वरता राँहता साड़ी ओले आन्दुल  
बोल आगासदीपताल रैसी दुनियातोड़ लोगोड़कुन जीवन सीयातोल।

34 ओड़ ओन इत्तुड़:— ये प्रभुनी, इद्दे साड़ी माकुन हमेशा सीम।

टीका : 1. मरूस्थल = बेगा बडांगे तिन्दाले उन्दाले हैल्ले पट्टो।

मन्ना = परमेश्वर ओड़ोड़ पुर्खालोड़कुन तिन्दाले आगासदीपताल साड़ी राँहची सीसी मत्तोल। इद साडीतून “मन्ना” इन्दुड़।

35 यीशु ओड़कुन इत्तलः—

जीवनता साड़ी अन्ना आन्दान,  
ना-करूम बोले वायेल ते ओन बप्पोड़े करूम हैल्ले वस्सो,  
ना-पर्रो बोले बिश्वास केवेल ते ओल बप्पोड़े प्यासो हैल्ले आयोल।

36 अन्ना मीकुन इत्तान कि इम्माट हूड़तोड़ीट पर बिश्वास हैल्ले केवीट।

37 दाऊ नाकुन बच्चोड़ सीयातोल ओड़ सब्रोड़ ना-करूम वायानुड़,  
अनि बोले ना-करूमि वायेल ते अन्ना ओन बप्पोड़े मल्हूची हैल्ले सेवोन।

38 बाड़ीकि अन्ना नावा मर्जी कीयाले हैल्ले,  
पर नावोल रॉहतोनवालेना मर्जी कीयाले आगासदीपताल रगसी वातोना।

39 नावोल रॉहतानवालेना मर्जी इद आन्द  
कि बच्चोड़ ओल नाकुन सीतोल  
ओड़ सब्रोड़-नड्डूमताल अन्ना बोने हैल्ले हंसोन,  
पर आखिरी दियाते ओड़कुन पिस्सूहची तेहका।

40 इद नावोल दाऊना मर्जी आन्द  
कि बोले मरीन हूड़सी ओन-पर्रो बिश्वास केवेल  
ते ओन हमेशाता जीवन प्ठसी दाल  
अनि आखिरी दियाते अन्ना ओन पिस्सूहची तेहका।

41 इच्चोड़े यहूदीड़ ओन-हिन्नाल कूड़कूड़े कीन्दुड़ कि ओल इन्जी मत्तोल कि  
आगासदीपताल रगता साड़ी अन्ना आन्दान। 42 ओड़ इन्दुड़ः— एल यूसुफनोल  
मरीं यीशु आन्दल कि हैल्ले, अम्माट ओनोल दाऊ-दाईन चीने माईतोड़ाम, ओल  
इन्गा बाहन इन्दातोल कि अन्ना आगासदीपताल रगतान?

43 यीशु ओड़कुन जवाब सीतलः— आपुसते कूड़कूड़े मिनी केमाट।

44 नावोल दाऊ बोल नाकुन रॉहतोल,  
ओल हैल्ले तड़ोल ते बोले ना-करूम हैल्ले वायोल  
कि अन्ना आखिरी दियाते ओन पिस्सूहची तेहका।  
नबीलोड़ ईहन लिखे कीतोड़ः—

“ओड़ सब परमेश्वरतोड़ करेहतालोड़ आयानुड़”

46 बोल दाऊना केन्ची करीतातोल ओल ना-करूम वाईतोल।  
इद हैल्ले कि बोले दाऊहड़ान हूड़तोल  
पर परमेश्वरतू-इग्गाटाल वातोल ओले दाऊन हूड़तोल।

47 अन्ना मीकुन सचो इन्दातोना,  
बोले बिश्वास केवेल ते हमेशाता जीवन ओना आन्द।

48 जीवनता साड़ी अन्ना आन्दान।

49 मीवोड़ पर्खालोड़ मरूस्थलते मन्ना तिन्दुड़ पर सासी हत्तुड़।



- 50 आगासदीपताल रगता साड़ी ईहन आन्द  
कि बोले तिन्नेल ते हैल्ले सायोल।
- 51 अन्ना इद आगासदीपताल रगता जीवन सीयानवाले साड़ी आन्दान,  
इद साड़ी बोले तिन्नेल ते हमेशा-लुगुस पिस्सानुल।  
इंगी, बद साड़ी अन्ना सीका अद नावा मेन्दुल आन्द,  
अनि अन्ना अद्देन दुनियातोड़ लागोड़कुन पिस्सूहताले सीका।
- 52 यहूदीइ आपुसते इद मान्दीना टंटा लगे कीसी इन्दा लातुड़:-  
एल माकुन तन्वा मेन्दुल तिन्दाले बबाह सीयानुल?
- 53 यीशु ओड़कुन इत्तुल:-  
अन्ना मीकुन सचो मान्दी इन्दातोना,  
बनी आदमनोल मरीना मेन्दुदुन हैल्ले तिनवीट  
अनि ओना नत्तुडुन हैल्ले उनवीट  
ते मी-रोपा जीवन हैल्ले आयो।
- 54 बोले नावा मेन्दुदुन तिन्नेल अनि नावा नत्तुडुन उन्नेल  
ते हमेशाता जीवन ओना आन्द  
अनि अन्ना आखिरी दियाते ओन पिस्सूहची तेहका।
- 55 बाड़ीकि नावा मेन्दुल सचो साड़ी  
अनि नावा नत्तुर सचो उन्दाना चीज आन्द।
- 56 नावा मेन्दुदुन तिन्दातोल अनि नावा नत्तुडुन उन्दातोल  
ओल ना-रोपा मन्दातोल अनि अन्ना ओन-रोपा मन्दातोना।
- 57 जीवन सीयानवाले दाऊ नाकुन रॉहतुल  
अनि अन्ना दाऊना जरियाते पिस्सीतोना,  
आहुन्ने ओल भी नावा जरियाते पिस्सानुल  
बोल तन्वा जीवाते नाकुन पूरो रीत-ताल ग्रहण कीयातोल।
- 58 आगासदीपाताल रगता साड़ी ईहन हैल्ले आयो बाहुन पुर्खालोड़ तित्तुड़,  
ओड़ सासी हत्तुड़ पर बोले इद साड़ी तिन्नेल ते हमेशा-लुगुस पिस्सानुल।
- 59 कफरनाहूम शहरते करेहनाके ओल यहूदीइ भजनता रोते इद मान्दी  
वंकतुल।
- 60 इद मान्दी केन्ची वल्ले चेलालोड़ इन्दा लातुड़:-
- 61 इद मान्दी पार मुशकील आन्द, इद्देन बोल केन्जानुल? पर यीशु मनते  
पुत्तुल कि चेलालोड़ इद मान्दीत्-हिन्नाल कूड़कुड़े कीयातोड़ अनि ओल ओड़कुन  
इत्तुल:- 62 इद मान्दीता मीकुन झटका लागता कि बाह? अनि इम्माट  
बनीआदमनोल मरीन तन्वा पहिलो जगाते परों हन्नाके हूड़कीट ते बाहुन लागल?

63 जीवन सीयातोल ओल आत्मा आन्दुल,

मेन्दुडाल जीवन हैल्ले आयो।

अन्ना मी-से मान्दी इन्दातोना

इद मान्दीता जरियाते जीवन सीयानवाले आत्मा पुटिता।

64 पर मी-नड्डूम बोड़े बोड़े बिश्वास हैल्ले केवोड़।

यीशु मुन्नेटाल पुत्तुल कि बिश्वास बोड़ हैल्ले केवोड़ अनि नाकून बोल बैस्तानुल। 65 ओल ओन्डे इत्तुल:— तेन-हिन्नाल अन्ना मीकून इन्जीतोना कि बप्पोड़-लुगस दाऊ वाया हैल्ले सेवोल अप्पोड़-लुगस वोले ना-करूम हैल्ले वायोल।

66 इद मान्दीत्-हिन्नाल लईसोड़ ओन छोड़े कीसी ओन-संगने ओन्डे हैल्ले ताकोड़। 67 यीशु तन्वोड़ बारह चेलालोड़कून पूछे कीतुल:— बड़ांग् इम्माट भी नाकून छोड़े कीसी दाकीट? 68 शमोन पतरस ओन जवाब सीतुल:— ये प्रभुनी, अम्माट बोन-करूम दाकोम, हमेशाता जीवनता मान्दींग् नी-करूम आन्दुंग्। 69 अम्माट बिश्वास कीतोड़ाम अनि पुत्तोड़ाम कि परमेश्वरतोल पवित्र इम्माई आन्दी। 70 यीशु ओड़कून जवाब सीतुल:—अन्ना मीक| बारहकून आची येतोना कि हैल्ले? 71 अनि मी-नड्डूम वोड़ुल शैतान भी आन्दुल। ओल इहून शमोन इस्कारयोतीनोल मरीं यहूदान्-हिन्नाल वंकन्दुल बाड़ीकि ओल बारहकना नड्डूमटोल आसी पिज्जाड़े यीशुन बेईस्तानवाले आतुल।

तेन-पिज्जा यीशु गलील देशते मन्दुल, यहूदिया देशते हनवक आतुल  
7 बाड़ीक यहूदीड़ ओन जॉकसी वाटी आन्दुड़।

2 यहूदीड़ा "झोप्डी" पड़ोडा तेवहार आयान-परों मत्ता। 3 ओनोड़ तम्मूड़ ओन इन्दा लातुड़:— इग्गटाल पसीसी यहूदीड़ा देशते हन कि नीवोड़ बिश्वास कीयानवालेड़ नीवा काम्कनुंग् हूड़ानुड़। 4 बोले तन्वातुन उजागर कीयाले बदे काम कीयातोल ते मकसी हैल्ले केवोल। इम्मा ईहून काम कीयातोनी ते दुनियातुन दीसूहा। 5 ओनोड़ तम्मूड़ भी ओन-परों बिश्वास हैल्ले केवोड़। 6 यीशु ओड़कून इत्तुल:— नावा घड़ी इंगा हैल्ले वायो, पर मीवा घड़ी बप्पोड़े भी आईता। 7 दुनिया मीकून हैल्ले पास्को पर नाकून पास्कीता बाड़ीकि अन्ना इन्दातोना कि ताना काम्क बुरो आन्दुंग्। 8 इम्माट तेवहारते दाकीट, अन्ना इंगा हैल्ले हन्नोन बाड़ी कि इंगा नावा घड़ी हैल्ले आयो। 9 ईहून इन्जी ओल गलील देशते रहे मातुल पर ओनोड़ तम्मूड़ तेवहारते हत्तुड़।

10 पिज्जाड़े ओल भी तेवहारते हत्तुल पर मकसी हत्तुल कि बोले हैल्ले पुन्नोल। 11 तेवहारते यहूदीड़ ओन पिड़कन्दुड़, बेगा आन्दुल इन्दुड़। 12 लोगोड़ चमेकेते ओन-हिन्नाल खूब मान्दी कीन्दुड़: बच्चोड़ इन्दुड़ कि ओल अस्सल आन्दुल,

दूसरोड़ इन्दुड़ कि अस्सल हैल्ले, लोगोड़कुन भरम कीयातोल। 13 पर बोले ओना मन्दी खुलमखुल्ला हैल्ले केवोल बाड़ीकि यहूदीड़ा-हिन्नाल वरीन्दुड़।

14 तेवहारत्-नड्डूम यीशु मन्दिरते सोड़ीसी उपदेश कीया लातुल। 15 यहूदीड़ अचरज कीसी इन्दा लातुड़:- एल बप्पोड़े हैल्ले करीयोल अनि बाहुन पढ़े-लिखो आसी हत्तोल? 16 यीशु ओड़कुन जवाब सीतुल:-

17 नावा उपदेश नावा हैल्ले पर नावोल रॉहतोनवालेना आन्द।  
बोले ओना मर्जीत-परों ताकी आईतोल ओल पुन्दानुल  
कि इद उपदेश परमेश्वरत्-खाकनाल आन्द  
या अन्ना नावा खाकनाल वंकीतोना।

18 बोले तन्वा खाकनाल वंकीतोल ते तन्वाई बड़ाई कीयातोल,  
वर बोल तन्वोल रॉहतानवालेना बड़ाई कीया आईतोल  
ओल सच्चोल आन्दुल अनि बाहुने भी फन्दी हैल्ले आयोल।

19 मूसाल मीकुन धर्मता कानून सीतुल  
पर कानुन्त-लेखा कीयानवाले मी-नड्डूम बोले भी हैल्ले पुट्टोल।  
इम्माट नाकुन जाँकसी वाटी बाड़ी आईतोड़ीट?

20 लोगोड़ जवाब सीतुड़:- नीकुन भूत तरगसी हत्ता। नीकुन जाँकसी वाटी बोल आईतोल? 21 यीशु ओड़कुन इत्तुल:- नावा उन्दी अचरजता काम हूड़सी इम्माट सब अचरज कीयातोड़ीट। 22 मूसाल मीकुन खतना कीयाना नीयम सीतोल पर इद मूसाना मन्दी हैल्ले, पुर्खालोड़ा मन्दी आन्द अनि इम्माट सनीचरता दिया तूड़ाना खतना कीयातोड़ीट। 23 मूसाना कानून पाले कीयाले सनीचरता दिया तूड़ाना खतना आईता, ते डममाट ना-परों बाड़ी गुस्सा आईतोड़ीट कि सनीचरत्-नेटी अन्ना बोनई पूरो मेन्दूदुन नेंडसूहतोना? 24 बाहरोता मन्दी हूड़सी फैसला मिनी केमाट, पर सच्चवाईता विचार कीसी फैसला कीम्ट।

25 यरूशालेमतोड़ बोड़े मन्दानवालेड़ इन्दा लातुड़:- 26 लोगोड़ बोन जाँककीले आईतोड़ एले आन्दुल कि बाह? हूड़ाट, ओल खुल्लमखुल्ला वंकीतोल अनि ओड़ बड़ांगे हैल्ले इन्नोड़। बड़ांग् मुख्यालोड़ ओन मसीह समझे मासी माने केवेड़? 27 पर एल बेगाटाल वातोल अम्माट पुत्तोड़ाम, मसोह वायानुल ते बोले हैल्ले पुन्नोल कि बेगाटाल वातोल।

28 यीशु मन्दिरते करेहन्दुल अनि फड़ा लंगते इत्तुल:-  
बड़ांग् सच आन्द कि इम्माट नाकुन चीन्हे माईतोड़ीट  
अनि पुत्तोड़ीट कि बेगाटाल वातोना?  
पर अन्ना नावा मनसे हैल्ले वायोन,  
नाकुन रॉहची सीतोल ओल सच्चोल आन्दुल

अनि इम्माट ओन हैल्ले पुनवीट।

29 अन्ना ओन पुत्तोना बाडीकि ओन-इग्गाटाल वातोना  
अनि ओले नाकुन राँहतोल।

30 ओड़ ओन बैई आन्दुड़ पर बोले ओन हैल्ले बैयोल बाडीकि ओना घड़ी हैल्ले  
वायो।

31 पर लोगोड़-इप्पी वल्लेसोड़ ओन-परों बिश्वास कीन्दुड़, अनि एड़ इन्दुड़:—  
मसीह वायानुल ते एनसे मयसी बड़ांग् अजीब काम्क दीसूहानुल? 32 इद मान्दी  
चमेकेते वंकन्दुड़ पर फरीसीड़ केन्जन्दुड़ कि इद मान्दी लोगोड़ा-नड्डूम ताकीता,  
ते ओड़ अनि फड़ोड़ याजकोड़ ओन बैईले सिपाहीड़कुन राँहतुड़।

33 यीशु ओड़कुन इत्तुल:—

अन्ना इन्गा मी-नड्डूम थोड़ोसो दियांग् मन्दाका,  
अनि नावोल राँहतावालेन-इग्गा दाका।

34 इम्माट नाकुन पिड़काकीट पर अन्ना हैल्ले पुट्टोन।

बेगा अन्ना आईका अग्गा वायाना मी-से हैल्ले बने मायो।

35 यहूदीड़ आपुसते इन्दा लातुड़:— एल बेगा दानुल कि माकुन हैल्ले पुट्टोल?  
बड़ांग् मावा देशटाल बाहरो मन्दानवालेड़ यहूदीड़ा-नड्डूम हन्जी अगातोड़  
लोगोड़कुन करेहतानुल? 36 ओल बड़ांग् वंकीतोल कि पिड़काकीट पर हैल्ले  
पुट्टोन, अनि बेगा दाका अग्गा हैल्ले वाईवीट?

37 आखिर दियाते — तेवहारता फड़ा दिया — यीशु नित्ची फड़ा लेंगते  
इत्तुल:—

बोले प्यासो आयेल ते ना-करूम वासी उन्नील,

38 बोले ना-परों बिश्वास केवेल ते

ओना जीवाटाल जीवन सीयानवाले येता सोतांग् वायानुंग्  
बाहुन शास्त्रते लिखे माता।

39 ओल इद मान्दी पवित्र आत्मात्-हिन्नाल वन्कन्दुल। पवित्र आत्मा बिश्वास  
कीयानवालेड़-परों वायानावाले मत्तोल, पर अद झोगते हैल्ले मन्नोल बाडीकि  
यीशु अप्पोड़-लुगुस तन्वा महिमाते हैल्ले अव्वोल।

40 इद मान्दी केन्ची बोड़े इन्दा लातुड़:— एल सचमुच ओल नबी आन्दुल।

41 दूसरोड़ इन्दुड़:— एल तो मसीह आन्दुल। पर बोड़े इन्दुड़:— गलील देशटाल

मसीह बबाह वायानुल? 42 शास्त्रते ईहन लिखे माता कि दाऊदता पाड़ीते अनि

दाऊदता नार बैथलहेमताल वायानुल। 43 अनि ओन-हिन्नाल ओड़-नड्डूम

झगड़ा आसी हत्त। 44 बोड़े ओन बैईले आन्दुड़, पर बोले ओन हैल्ले बैयोल।

45 सिपाहीइ मलसी वातुइ अनि याजकोइ अनि फरीसीइ ओइकुइ पूछे कीतुइ:- ओन बाडी तइवीट? 46 सिपाहीइ जवाब सीतुइ: बोसं बप्पोडे ओन-लेखा हैल्ले वंकोल। 47 फरीसीइ इत्तुइ:- इम्माट भी भरमे मासी हत्तोडीट कि बाह? 48 सेनालोइल या फरीसीइल बोल ओन-परों बिश्वास कीतोल? 49 पर एइ शास्त्रतुन हैल्ले पुन्नोइ एइ कुरगाटा आयल। 50 निकुदेमुस ओइ-नड्डूम मत्तोल, ओल यीशु-करूम मुन्ने वासी मत्तोल, ओल इन्दा लातुल:- 51 बोनाई मान्दी केन्जान-मीचुक, अनि ओल बड़ांग् कीयातोल पुन्दान-मीचुक, ओन-परों दोष लगे कीयाना मावा कानूनता खिलाफ् आन्द। 52 ओइ ओन जवाब सीतुइ:- बड़ांग् इम्मा भी गलील-देशतोनी आन्दी? पिइकसी हूइ कि गलील-देशताल बोले नबी बप्पोडे हैल्ले वायोल।

53 अनि सब रोन हत्तुइ।

पर यीशु जैतून मट्टात्-परों हत्तुल।

**8** 2 सकाडे ओल मन्दिरते ओंडे वातुल अनि सब लोग ओन-करूम वान्दुइ। ओल उदसी ओइकुन करेहता लातुल।

3 सेनालोइ अनि फरीसीइ बद्दे माईन छिनाला कीनाके बैसी अरीं वातुइ, अनि तान सामनो नित्सूहची ओइ यीशुन इन्दा लातुइ:- 4 महाराज, इद माईन छिनाला कीनाके बैईतोड़ाम, 5 मूसाल कानूनते हुकुम सीतोल कि ईतांग् माईकनुंग् टॉन्गींग् जीसी जॉक्सी वाटट, इम्मा तेन-हिन्नाल बड़ांग् इन्दातोनी? 6 ओइ इद मतलब मत्ता कि यीशुन परखे कीसी बदे भी मान्दीता दोष लगे कीकट। पर यीशु नवीसी घरतीत्-परों विरिन्जते लिखे कीया लातुल। 7 ओइ पूछे कीया हैल्ले छोडे केवोइ अनि ओल सर्को आसी इत्तुल:- मी-नड्डूम बोल पाप-मीचुक आन्दुल ओले पहलो टॉन्गी जेवील। 8 अनि ओल ओंडे नवीसी घरतीत्-परों लिखे कीया लातुल। 9 इद मान्दी केन्ची मुन्ने सेनालोइ ओंडे वोइल वोइल कीसी अग्गाटाल हत्तुइ। वडोले यीशु रहे मातुल, अनि माई तन्वा जगाते। 10 यीशु सर्को आसी अद्देन इत्तुल:- ओइ बेगा हत्तोइ? बड़ांग् बोले नी-परों दोष हैल्ले लगे केवोल? अद जवाब सीतु:- 11 बोले हैल्ले, प्रभुनी। यीशु इत्तुल:- अन्ना भी नी-परों दोष हैल्ले लगे केवोन, हन, इंगा ओंडे पाप मिनी केमा।

12 यीशु फरीसीइकुन ओंडे इत्तुल:-

दुनियाता वेर्ची अन्ना आन्दान। -

बोल ना-पिज्जा ताकीतोल ओल सिकाटीते बप्पोडे हैल्ले ताकोल

पर ओन जीवनता वेर्ची पट्टल।

टीका . 1. "अन्ना आन्दान" -- इद परमेश्वरता उन्दी पडोडा अन्वाद आन्द।

13 इद मान्दी केन्ची फरीसीड ओन इत्तुडः— इम्मा नी-हिन्नाल गवाही सीयातोनी, नीवा इद गवाहीता बद्दे साबूत हैल्ले आयो। 14 यीशु ओड़कुन जवाब सीसी इत्तुलः—

अन्ना ना-हिन्नाल गवाही सीयातोना,  
पर नावा गवाही सच्चो आन्द —  
अन्ना तो पुत्तोना कि बेगाटाल वातोना अनि बेगा दाका,  
इद मान्दी इम्माट हैल्ले पुनवीट।

15 इम्माट दुनियात्-लेका फैसला कीयातोड़ीट

अन्ना बोनाई फैसला हैल्ले केवोन

16 पर फैसला केवेना ते नावा फैसला सचो आयल

बाड़ीकि अन्ना वर्रोना हैल्ले,

अन्ना आन्दान अनि नावोल रॉहतानवाले दाऊ भी आन्दुल।

17 मीवा कानूनते लिखे माता कि रंड झान्कना गवाही सच्चो आईता।

18 अन्ना भी नावा गवाही सीयातोना

अनि नावोल रॉहतानवाले दाऊ भी नावा गवाही सीयातोल।

19 इद मान्दी केन्ची ओड़ ओन इत्तुडः— बेगा आन्दुल नीवोल दाऊ? यीशु ओड़कुन जवाब सीतुलः—

इम्माट नाकुन चीन्हे हैल्ले माइवीट

अनि नावोल दाऊन भी चीन्हे हैल्ले माइवीट।

नाकुन चन्हे मायेड़ीट ते नावोल दाऊन भी चीन्हे मायेड़ीट।

20 इद मान्दी ओल मन्दिरत्-रोपा करेहनाके खजानाता जगाते वंकतुल, अनि बोले ओन हैल्ले बैयोल, बाड़ीकि ओना घड़ी हैल्ले मन्नो।

21 ओल ओड़कुन ओंडे इत्तुलः—

अन्ना दाका अनि इम्माट नाकुन पिड़काकीट,

अनि मीवा पाप्कने सायकीट।

बेगा अन्ना दाका अग्गा वायाना मी-से हैल्ले बने मायो।

22 यहूदीड इन्दा लातुडः— ओल तन्वातुन जाँक्सी वाटानुल कि बाह — कि इन्दातोल बेगा दाका अग्गा वायाना मी-से हैल्ले बने मायो।

23 ओल ओड़कुन इत्तुलः—

इम्माट दुनियातोड़ीट आन्दीट,

अन्ना आगासतोना आन्दान।

इम्माट इद सन्सारतोड़ीट आन्दीट,

अन्ना इद सन्सारतोना हैल्ले।

- 24 इद्देन-हिन्नाल अन्ना मीकुन इत्तान कि मीवा पाप्कने सायकीट,  
बाड़ीकि अगर इम्माट ना-परों बिश्वास हैल्ले केवीट  
कि अन्ना ओले आन्दान।  
ते इम्माट मीवा पाप्कने सायकीट।
- 25 ओड़ ओन इत्तुड़:— इम्मा बोनी आन्दी? यीशु इत्तुल:—  
बाहुन अन्ना मीकुन मुन्नेताल बते कीतोना अन्ना ओले आन्दान।
- 26 नाकुन मी-हिन्नाल वल्ले मान्दींग वंकाना  
अनि वल्ले मान्दींगना दोष लगे कीयाना आन्द  
पर नावोल रॉहतानवाले सच्चोल आन्दुल,  
ओनसे केन्जतात दुनियातुन वेहतातोना।
- 27 ओड़ हैल्ले समझे मायोड़ कि ओल माकुन परमेश्वर-दाऊता मान्दी  
इन्दातोल।
- 28 तेन—हिन्नाल यीशु इत्तुल:—  
इम्माट बनिआदमनोल मरीन तरूहकीट अन्टी पुन्दाकीट  
कि अन्ना ओले आन्दान  
अनि कि वरोंना आसी बड़ांगे हैल्ले केवोन  
पर बाहुन दाऊ नाकुन करेहतुल ईता मान्दींग वंकीतोना।
- 29 अनि नावोल रॉहतानवाले ना-संगने मन्दातोल,  
ओल नाकुन वरोंले हैल्ले छोड़े केवोल,  
बाड़ीकि अन्ना हमेशा ओना खुशीत्-लेका कीयातोना।
- 30 यीशुना इव मान्दींग केन्चीकुन वल्लेसोड़ ओन-परों बिश्वास कीतुड़।
- 31 ओन-परों बिश्वास कीयानवालेड़ यहूदीड़कुन यीशु इन्दा लातुल:—  
इम्माट नावा मान्दीत्-लेखा ताकाकीट  
ते सचमुच नावोड़ चेलालोड़ीट आईकीट।
- 32 अनि इम्माट सच्चाईतुन पुन्दाकीट  
अनि सच्चाई मीकुन स्वतन्त्र कीयल।
- 33 ओड़ ओन जवाब सीतुड़: अम्माट अब्राहामता पाड़ीतोड़ाम, इंगा-लुगुस  
बोनाई गुलामीते हैल्ले मन्नोम, इम्मा बाहुन इन्दातोनी कि आजाद आईकीट?
- 34 यीशु ओड़कुन इत्तुल:—  
अन्ना मीकुन सच सच इन्दातोना,  
बोल पाप कीयातोल ओल पापता गुलाम आन्दुल।
- 35 गुलाम सब दिन रोते हैल्ले मन्नोल — मरी सब दिन मन्दातोल।

36 मरीं मीकून आजाद कीयानुल ते इम्माट सचमुच आजाद आईकीट।

37 अन्ना पुत्तोना कि इम्माट अब्राहामता पाड़ीतोड़ आन्दीट,  
पर इम्माट नाकून जाँककीले आईतोड़ीट

बाड़ीकि नावा मान्दीत्-हिन्नाल मीवा मन्ते जगा हैल्ले।

38 नावोल दाऊ नाकून वेहतोल आतल मान्दी वंकीतोना  
अनि इम्माट मीवोल दाऊना मान्दी केन्ची कीयातोड़ीट।

39 ओड़ जवाब सीसी ओन इत्तुड़:- मावोल दाऊ अब्राहाम आन्दल। यीशु  
ओड़कून इत्तुल:-

इम्माट अब्राहामता छौवानीट आयेड़ीट ते अब्राहामात्-लेखाता काम्क  
केवेड़ीट।

40 अन्ना परमेश्वरसे केन्ची मीकून सच्चाईता मान्दी वेहतातोना  
अनि इम्माट इन्गा नाकून जाँककी आईतोड़ीट -  
अब्राहाम ईहन हैल्ले केवोल।

41 इम्माट मीवोल दाऊन्-लेखाता काम कीयातोड़ीट।

ओड़ ओन इत्तुड़:- अम्माट हरामसे हैल्ले पैदा आयोम. मावोल वोड़ल दाऊ  
आन्दल, ओल परमेश्वर आन्दल। 42 यीशु ओड़कून इत्तुल:-

परमेश्वर मीवोल दाऊ आयेल तो इम्माट नाकून प्रेम केवेड़ीट  
बाड़ीकि अन्ना परमेश्वरताल पसीसी वातोना।

अन्ना नावा मनसे हैल्ले वायोन पर ओल नाकून राँहतोल।

43 अन्ना वंकीतोना ते इम्माट बाड़ी हैल्ले समझे मायवीट?  
तेन-हिन्नाल कि इम्माट नावा मान्दी केन्जी हैल्ले आयवीट।

44 इम्माट मीवोल दाऊ शैतानतोड़ीट आन्दीट

अनि मीवोल दाऊना मरजीत्-लेका कीया आईतोड़ीट।

ओल मुन्नेताल खूनी आन्दल, सच्चाईत-परों हैल्ले ताकोल,

बाड़ीकि ओन-रोपा सच्चाई बिलकुल हैल्ले आयो।

ओल फंदी मान्दी वंकीतोल अनि तन्वा ही मान्दी वंकीतोल

बाड़ीकि ओल फंदी वंकानवाले आन्दल, अनि फंदीनोल दाऊ आन्दल।

45 पर अन्ना सच्चाई वंकीतोना तेन-हिन्नाल ना-परों बिश्वास हैल्ले केवीट।

46 मी-नड्डूमटाल बोल नाकून पापता दोष लगे कीयातोल?

47 सच्चाई वंकीतोना ते बिश्वास बाड़ी हैल्ले केवीट?

बोल परमेश्वरतोल आन्दल ओल परमेश्वरता मान्दी केन्जीतोल -

इम्माट परमेश्वरतोड़ीट हैल्ले, अनि हैल्ले केन्जवीट।

48 यहूदीड़ ओन जवाब सीसी इत्तुड़:- अम्माट ठीक वंकतोड़ाम कि इम्मा  
सामरीनी आन्दी अनि नी-रोपा भूत आन्द।



49 यीशु ओड़कुन जवाब सीतुलः—

ना-रोपा भूत हैल्ले आयो,  
अन्ना नावोल दाऊना इज्जत कीयातोना,  
इम्माट नावा बेइज्जती कीयातोड़ीट।

50 पर अन्ना नावा बड़ाई हैल्ले चाहे मायोन -  
वोडुल चाहे माईतोल अनि फ़ैसला कीयातोल।

51 अन्ना मीकुन सच सच इन्दातोना,  
बोल नावा मान्दी माने कीयातोल ओल बप्पोड़े हैल्ले सायोल।

52 यहूदीड ओन इत्तुडः— इन्गा पुत्ताम कि नी-रोपा भूत आन्द। अब्राहाम अनि नबीड सब सासी हत्तुड, अनि इम्मा वंकीतोनी कि बोल नावा मान्दी माने कीयातोल बप्पोड़े हैल्ले सायोल। 53 मावोल दाऊ अब्राहाम सासी हत्तुल, बड़ांग् इम्मा ओनसे मयसी आन्दी? — नबीड भी सासी हत्तुड। इम्मा बोल बने माईतोनी?

54 यीशु ओड़कुन जवाब सीतुलः—

अन्ना नावा बड़ाई केवेना ते अद बड़ांगे हैल्ले आईवल।  
नावोल दाऊ नावा बड़ाई कीयातोल,  
एल ओले आन्दुल बोन-हिन्नाल इम्माट वंकीतोड़ीट  
कि मावोल परमेश्वर आन्दुल  
पर इम्माट ओन हैल्ले चीन्हे मायवीट।  
अन्ना ओन चीन्हे माईतोना।

55 हैल्ले चीन्हे मायोन ईहून वेंकेना ते मीलेका फ़न्दी बने मायेना।

पर ओन चीन्हे माईतोना अनि ओना मान्दी माने कीयातोना।

56 नावा वायाना दिन हूडान-हिन्नाल मुन्नेताल  
मीवोल दाऊ अब्राहामतुन बाको आनन्द आत,  
अनि हूडसीकुन खुश आतुल।

57 यहूदीड ओन इत्तुडः— पचास बरसानी हैल्ले आईवी, अनि इम्मा अब्राहामतुन बबाह हूडतोनी?

58 यीशु ओड़कुन जवाब सीतुलः— नावा बिश्वास कीम्ट,  
अब्राहामना पैदा आयान-मुन्नेताल अन्ना आन्दान।

59 इद मान्दी केन्ची ओड़ ओन जीयाले टॉन्गींग् तहता लातुड पर यीशु मकसी मन्दिरटाल पसीसी हत्तुल।

हन्ना-हन्नाके ओल वोड्ण हूड्तुल, एल जनमतोल अन्धाल मत्तोल।  
 9 2 चेलालोड् पूछे कीतुड्:- ये रब्बीनी, एल जनमतोल अन्धाल आन्दुल ते पाप बोल कीतोल, एल कीतोल या एनोड् अच्वाल-बाबाल कीतोड्? 3 यीशु जवाब सीतुल:- एना पाप्त्-हिन्नाल हैल्ले, अनि एनोड् अच्वाल-बाबाना पाप्त्-हिन्नाल भी हैल्ले, पर तेन-हिन्नाल एल अन्धाल पैदा आतुल कि परमेश्वरता काम एन-रोपा उजागर आयल।

4 दिन मन्दाता

अंटी-लुगुस नाकून नाबोल रॉहतानवालेना काम कीयाना जरूरी आन्द।

नरका वाईता

अनि बड़ांगे भी कीयाना हैल्ले बने मायो।

5 इद दुनियाते मन्दातोना

अंटी-लुगुस दुनियाता वेर्चीना आन्दान।

6 ईहून वंकसी ओल धरतीत्-परों उचसी तोड़ीते उच मिले कीसी अन्धाना कन्कून-परों सोकतुल। 7 अनि ओन इत्तुल:- हन, शीलोह! पड़ोडा कंडते नॉरसी येना। ओल हन्जी नॉरतुल अनि हूड्सोडे मलसी वातुल। 8 नारवालेड् अनि मुन्ने ओन भीक तलेहकनाके हूड्सीतोड् इन्दा लानुड्:- एल ते ओले आन्दुल कि हैल्ले, उदसीकून भीक तलेहकन्दुल? 9 दूसरोड् इन्दुड्:- ओले ही आन्दुल। पर ओंडे इन्दुड्:- हैल्ले, पर ओन-लेका दीसीतोल। 10 ओल तन्ना इत्तुल:- अन्ना तो ओले आन्दान। फिर ओड् ओन पूछे कीतुड्:- ते नीवा कन्क बबाह चाँककोंग् आतुंग्? 11 ओल जवाब सीतुल:- यीशु पड़ोडोल वोडुल नावा कन्कून-परों तोड़ी पिस्कसीकून सोकतुल अनि नाकून इत्तुल कि शीलोहते हन्जी नॉरसी येना ते हत्तान अनि नॉरसी हूडी लातान। 12 ओड् ओन इत्तुड्:- ओल बेगा आन्दुल? ओल इत्तुल:- अन्ना हैल्ले पुन्नोन।

13 ओड् ओन फरीसीडा-सामनो वोतुड् बोल मुन्ने अन्धाल मत्तोल। 14 अद दिया सनीचर-नेटी मत्ता, बप्पोड् यीशु तोड़ी पिस्कसी अन्धाना कन्कून चाँकको कीसी मत्तोल। 15 फरीसीड् ओंडे पूछे कीतुड्:- इम्मा बाहून हूडी लाती? ओल इत्तुल:- ओल नावा कन्कून-परों तोड़ी लगे कीतुल अनि अन्ना नॉरसी इन्गा हूडीतोना। 16 तेन्-परों फरीसीडा-नड्डूम बोडे इन्दा लातुड्:- एल परमेश्वरत-इग्गाटाल हैल्ले वायोल, सनीचर-नेटीता कानून हैल्ले माने केवोल। दूसरोड् इत्तुड्:- पाप कीयानवाले आहून अजीब काम्क बाहून कीयानुल

17 अनि ओड़-नड्डूम झगड़ा आसी हत। ओड़ अन्धान ओंडे इत्तुड़:- नीवा कन्कन चॉक्को कीतुल इम्मा ओन-हिन्नाल बड़ांग् इन्दातोनी? ओल इत्तुल:- नबी आन्दुल। 18 यहूदीड़ ओना भरोसा हैल्ले केवोड़ कि अन्धा मत्तोल अनि इन्गा हूड़ीतोल, पर ओना दाई-दाऊन केईसी पूछे कीतुड़:- 19 इम्माट वंकीतोड़ीट कि मावोल मरीं अन्धाल पैदा आसी मत्तोल कि बाह? - एल ओले आन्दुल कि हैल्ले? ते इन्गा बबाह हूड़ीतोल? 20 दाई-दाऊ जवाब सीतुड़:- मावोल मरीं एले आन्दुल अनि अन्धाल जरूर पैदा आतुल, इच्चो पुत्तोड़ाम, 21 पर बबाह हूड़ीतोल हैल्ले पुन्नोम, ओना कन्कन बोल चॉक्को कीतोल पुन्नोम। ओल होशियार आन्दुल, ओन पूछे कीम्ट, तना वंकानुल। 22 दाई-दाऊ यहूदीड़कन वरीसी ईहन इत्तुड़ बाड़ीकि यहूदीड़ सलाह कीसीतोड़ कि मसीह समझे कीसी बोले यीशुन माने कीयानुल ते एन भजनता रोताल टंडाकट। 23 तेन्-हिन्नाल दाई-दाऊ इन्दुड़:- होशियार आन्दुल, ओनसे पूछे कीम्ट। 24 यहूदीड़ ओन ओंडे केईसी इत्तुड़:- इम्मा परमेश्वरतां पड़ोल येची सच्चाई वंका, - अम्माट पुत्तोड़ाम कि एल पापी आन्दुल।

25 ओल जवाब सीतुल:- पापी आन्दुल कि हैल्ले अन्ना पुन्नोन, - उन्दी मान्दी पुत्तोना, अन्धाना मत्तोना अनि इंगा हूड़ीतोना।

26 ओड़ ओन इत्तुड़:- ओल नीकन बड़ांग् कीतुल, नीवा कन्कन बाहन चॉक्को कीतुल? 27 ओल ओंडे जवाब सीतुल:- अन्ना इन्नेके इत्तान अनि इम्माट हैल्ले केन्जवीट, ओंडे बाड़ी केन्जी आईतोड़ीट, बड़ांग् इम्माट भी ओनोड़ चेलालोड़ बने मायकीट? 28 ओड़ ओना भलो बुरो इन्जी इत्तुड़:- इम्मा आन्दी ओनोल चेलानी, अम्माट मूसानोड़ चेलालोड़ आन्दाम। 29 अम्माट पुत्तोड़ाम कि मूसानसे परमेश्वर मान्दी कीन्दुल, पर एल बेगाटाल वातोल हैल्ले पुन्नोम। 30 ओल ओड़कन जवाब सीसी इत्तुल:- अचरजता मान्दी आन्द कि बेगाटाल वातोल हैल्ले पुनवीट पर नावा कन्कन चॉक्को कीतोल। 31-अपलो पुत्तोड़ट कि परमेश्वर पापीड़ा हैल्ले केन्जोल, पर परमेश्वरता भक्ती कीसी ओना मर्जीत्-लेका ताकीतोल परमेश्वर ओना केन्जीतोल। 32 दुनिया गड़े माता अन्टीटाल ईहन खबर हैल्ले वायो कि जनमतोल अन्धाना कन्कन बोले चॉक्को कीतोल। 33 परमेश्वर्त्-इग्गाटाल एल हैल्ले वायेल ते बडांगे भी ओनसे हैल्ले बने माइवल। 34 ओड़ ओन जवाब सीतुड़:- इम्मा जनमताल ही पापी आतोनी अनि माकन बड़ांग् करेहतातोनी? अनि ओन टंडसी वाटतुड़।

35 यीशु केन्जतुल कि ओन टंडसी वाटतोड़ अनि ओनसे मिले मासी इत्तुल:- बड़ांग् इम्मा परमेश्वरतोल मरींन-परों बिश्वास कीयातोनी? 36 ओल जवाब सीतुल:- महाराजनी, ओल बोल आन्दुल कि अन्ना बिश्वास कीका? 37 यीशु ओन इत्तुल:- इम्मा ओन हूड़तोनी भी, अनि नी-संगने इंगा मान्दी कीयातोना ओले

आन्दान। 38 ओल इत्तुलः— महाराजनी, अन्ना बिश्वास कीयातोना। अनि ओल ओना काल करीसी प्रणाम कीतुल। 39 यीशु इत्तुलः— न्यायत्-हिन्नाल अन्ना इद दुनियाते वातोना, कि अन्धालोड़ हूडानुड़ अनि हूडानवालेड़ अन्धालोड़ आसी दानुड़। 40 ओना-संगतोड़ फरीसीड़ इद केन्ची इन्दा लातुड़ः— बड़ांग् अम्माट भी अन्धालोड़ाम आन्दाम? 41 यीशु ओड़कून इत्तुलः— इम्माट अन्धालोड़ीट आयेडीट ते दोषी हैल्ले आयेडीट, पर हूडीतोड़ोम इन्दातोड़ीट ते मीवा पाप्कना दोष बने मासी मन्दाता।

यीशु ओंडे इत्तुलः—

**10** अन्ना मीकून सच्चो मांदी इन्दातोना, फाटकनाल बोल हैल्ले वायोल, पर दूसरो सरदाल तरगसी भेंडालोड़ा-नड्डूम सोडीतातोल, एल कल्ले अनि डाकू आन्दुल। 2 फाटकना सरदाल सोडीतातोल ओल भेंडालोड़ोल मेहतानवाले आन्दुल। 3 ओन-हिन्नाल फाटकनोल केपानवाले रेंगस्तातोल, अनि ओल उन्दी-उन्दीना पड़ोल येची भेंडालोड़कून केईस्तातोल ते अव ओना लेंग् केन्जीतांग्, अनि ओल अवेनुंग् बाहरो वोईतोल। 4 बाहरो पसूहची ओल मुन्ने मुन्ने ताकीतोल अनि भेंडालोड़ पिज्जा पिज्जा ताकीतांग्, बाड़ीकि ओना लेंग् चीन्हे माईतांग्। 5 दूसरोन्-पिज्जा हैल्ले ताकोंग् पर जोडीसी हन्दातांग् बाड़ीकि ओना लेंग् हैल्ले चीन्हे मायोंग्। 6 यीशु ईहन ओड़कून करेहन्दुल, पर ओड़ ओना मान्दी हैल्ले समझे मायोड़।

7 यीशु ओड़कून ओंडे इत्तुलः—

अन्ना मीकून सच सच इन्दातोना,  
भेंडालोड़ा फाटक अन्ना आन्दान।

8 ना-मुन्ने बच्चोड़ वातोड़ सब कल्लेड़ अनि डाकूड़ आन्दुड़,  
भेंडालोड़ ओड़ा हैल्ले केन्जोंग्।

9 फाटक अन्ना आन्दान, ना-द्वारा बोल सोडीतातोल ओल पिस्सानुल,  
ओल रोपा हन्दानुल अनि बाहरो वायानुल  
अनि ओन मेईलेस्क जाड़ी पटल।

10 कल्ले वर कल्लीले अनि जाँककीले अनि नाश कीयाले वाईतोल,  
अन्ना जीवन सीयाले, ओंडे बहुतायतना जीवन सीयाले, वातोना।

11 अस्सल मेहतानवाले अन्ना आन्दान,  
अस्सल मेहतानवाले भेंडालोड़-हिन्नाल तनवा जीवा सीयातोल।

12 बनीहार सच्चोल मेहतानवाले हैल्ले आयोल  
अनि भेंडालोड़ोल मालिक भी हैल्ले आयोल,  
डॉन्गुडा जानवर वानाके हूडसी भेंडालोड़कून छोड़े कीसी जोडीसी हन्दातोल  
अनि जानवर भेंडालोड़-परों मोईसी अवेनुंग् गृहची अनि जोडेहची  
सीयाता।

- 13 बनीहार भेंडालोड़ा फिकर हैल्ले केवोल।
- 14 अस्सल मेहतानवाले अन्ना आन्दान।
- 15 दाऊ नाकून चीन्हे माईतोल अनि अन्ना दाऊन चीन्हे माईतोना-  
आहुने अन्ना नावोड़ लोगोड़कून चीन्हे माईतोना  
अनि नावोड़ लोगोड़ भी नाकून चीन्हे माईतोड़।
- 16 भेंडालोड़-हिन्नाल अन्ना नावा जीवा सीयातोना।  
नावांग् ओंडे भेंडालोड़ आन्दंग्, अव इद खाड़ूतांग् हैल्ले आयोंग्-  
अवेनुंग् भी तत्ताना नाकून जरूरी आन्द, अव नावा लेंग् केन्जानुंग्  
आहुन खाड़ू उन्दी ही आयल अनि वोड़ूल ही मेहतानवाले आयानुल।
- 17 तेन-हिन्नाल दाऊ नाकून प्रेम कीयातोल  
कि अन्ना नावा जीवा सीका अनि ओंडे नावा जीवा तहका।
- 18 नावा जीवा बोले जबरन हैल्ले येनोल,  
अन्ना नावा मनसे नावा जीवा सीका।  
जीवा सीसी सायाना अनि जीवा ओंडे तहची पिस्साना नावा हक आन्द,  
दाऊ नाकून ईहन हुकूम सीतोल।
- 19 इद मान्दीत्-हिन्नाल यहूदीड़-नड्डूम ओंडे झगड़ा आसी हत। 20 वल्लेसोड़  
ईहन इन्दा लातुड़:- ओन भूत तरगसी हत्ता, पागल आन्दूल, ओना बाड़ी केन्जी?  
21 दूसरोड़ इन्दुड़:- भूत तरगसी हन्वल ते ईतांग् मान्दींग् हैल्ले केवोल - भूत  
अन्धाना कन्कून बाहन चाँकको केवल?
- 22 पीनीता वकत मत्ता, अनि यरूशालेम शहरते मन्दिरता उद्घाटनता  
यादगारीता तेवहार ताकन्द। 23 यीशु मन्दित्-रोपा सुलेमानना ओसारेते  
वलीन्दूल। 24 यहूदीड़ ओन घेरे कीसी इन्दा लातुड़:- बप्पोड़-लुगुस माकून  
दुबधाते इर्राकी, सफ़ा बते कीम कि मसीहनी आन्दी कि हैल्ले? 25 यीशु ओड़कून  
जवाब सीतुल:-  
अन्ना मीकून बते कीतोना अनि इम्माट बिश्वास हैल्ले केवीट।  
नावोल दाऊना पड़ोडे बड़ंग् बड़ंग् कीयातोना  
इद ना-हिन्नाल गवाही सीयाता।
- 26 इम्माट नावा भेंडालोड़ीट हैल्ले आईवीट  
तेन-हिन्नाल बिश्वास हैल्ले केवीट।
- 18 नावा भेंडालोड़ नावा लेंग् केन्जीतांग्  
अन्ना अवेनुंग् चीन्हे माईतोना अनि अव ना-पिज्जा ताकीतांग्।
- 28 अन्ना अवेनुंग् हमेशाता जीवन सीयातोना,  
अव बप्पोड़े नाश हैल्ले आयोंग्,  
बोले अवेनुंग् नावा कैदाल हैल्ले गुहोल।

29 नाबोल दाऊ इवेनुंग् नावा कैदे सीतुल ओल सबसे माईसी आन्दुल,

दाऊना कैदाल अवेनुंग् गुहताना शक्ति बोर्नई हैल्ले आयो।

30 अन्ना अनि दाऊ वोडुल ही आन्दाम।

31 यहूदीइ ओन जीयाले टॉन्गींग् तहता लातुइ। 32 यीशु ओइकून इत्तुल:—  
दाऊना-खाकनाल लईसोंग् भलोंग् काम्क मी-साम्नो कीतोना — बदसो भलो  
काम्त-हिन्नाल नाकून टॉन्गींग् जीयातोड़ीट? 33 यहूदीइ ओन जवाब सीतुइ:—  
भलो काम्त-हिन्नाल हैल्ले जेवोम पर इम्मा आदमी आसी परमेश्वर बने मासी  
परमेश्वरता बेइज्जती कीयातोनी, तेन-हिन्नाल जीयातोड़ाम। 34 यीशु ओइकून  
जवाब सीतुल:—

मीवा शास्त्रते ईहून लिखे माता

"परमेश्वर इत्तुल कि इम्माट ईश्वर्त-लेका आन्दीट"

35 शास्त्रता मान्दी हमेशा सच्चो आईता;

ओल तेन-हिन्नाल ओइकून "ईश्वर" इन्जी वंकतुल  
कि ओइ-करूम परमेश्वरता वचन वासी मत्ता।

36 परमेश्वर-दाऊ नाकून ठररे कीसी दुनियाते रॉहतोल

अनि अन्ना इत्तोना कि परमेश्वरतोल मरीना आन्दान,

ते इम्माट बबाह इन्दातोड़ीट कि परमेश्वरता बेइज्जती कीयातोना?

37 अन्ना दाऊना काम्क हैल्ले केवोन ते नावा भरोसा मिनी केमाट।

38 पर अन्ना कीयातोना अनि नावा भरोसा हैल्ले केवीट,

ते इव काम्कून हूइसी भरोसा कीम्ट, अनि पुन्जी समझे माईकीट

कि दाऊहडाल ना-रोपा आन्दुल

अनि अन्ना दाऊन्-रोपा आन्दान।

39 ओइ ओन बैईले ओंडे कोशीश कीतुइ पर ओल ओइा कैकनाल पसीसी  
हत्तुल।

40 ओल यरदन ढोडात्-हवाड़ी हन्जी अग्गा अवतुल, बेगा यूहन्ना मुन्ने  
बप्तिस्मा सीन्दुल, अनि ओल अग्गा रहे मातुल। 41 लईसोइ ओन करूम वासी  
इन्दुइ:— यूहन्ना बड़ांगे भी अजीब काम हैल्ले केवोल वर एन-हिन्नाल बड़ांग्  
बड़ांग् वंकतुल सब सच्चों वंकतुल। अनि अग्गा लईसोइ यीशुन्-परों बिश्वास  
कीतुइ।

बैथन्याह नाटेनोल लाजर बीमार मत्तोल। 2 लाजरना रंटे सेलाहक  
**11** मरयम अनि मरथा भी अग्गा मन्दुंग्। प्रभुन्-परों अतर सोकसी ओना  
कालकनुंग् तलाडा चूटींगने उसूमसी मत्ता इद अद मरयम मत्ता। 3 रंटे सेलाहक  
प्रभुन्-करूम रॉहची इत्तुंग्:— प्रभुनी हूइ, नीवोल प्यारोल दोस्त खूब बीमार

आसी हत्तोल। 4 इद केन्जी यीशु इत्तुलः— इद बीमारी सायान्-हिन्नाल हैल्ले आयो पर परमेश्वरता महिमात्-हिन्नाल आन्द, परमेश्वरतोल मरीना महिमा तानसे उजागर आयल।

5 यीशु मरथान अनि ताना सेलान अनि लाजरतुन प्रेम कीन्दुल, 6 पर लाजरना बीमार आयाना मान्दी केन्ची यीशु ओंडे रंड दिया अग्गा रहे मातुल। 7 तेन-पिज्जा ओल चेलालोड़कुन इत्तुलः— दट, यहूदिया देशते मलसी दाकट। 8 चेलालोड़ इन्दा लातुड़ः— ये रब्बीनी, यहूदीड़ नीकुन इन्नेके टॉन्गींग् जीसी जाँक्की आन्दुड़ अनि ओंडे अग्गा मलसी दाकी? 9 यीशु जवाब सीतुलः—

बारह घंटा दिन आईता कि हैल्ले?

पीयल बोल ताकीतोल ठोकर हैल्ले तिन्नोल,  
बाड़ीकि इद दुनियाता वेर्ची हूडीतोल।

10 नर्का बोल ताकीतोल ठोकर तिन्जी अरीतोल,  
बाड़ीकि ओन-रोपा वेर्ची हैल्ले आयो।

11 ओल ईहन वंकसी ओंडे ओड़कुन इत्तुलः— मावोल दोस्त लाजर नामसी हत्तोल, पर अन्ना ओन तेहताले दाका। 12 चेलालोड़ इत्तुड़ः— ये प्रभुनी, नामीतोल ते नेंडानुल। 13 पर यीशु ओना सायाना मान्दी कीन्दुल पर ओड़ा समझते ओना नामसी रोमाना मतलब वात। 14 ते यीशु ओड़कुन साफ़ बते कीतुल कि लाजर सासी हत्तोल। 15 ओल इत्तुलः— अन्ना खुश आन्दान कि अग्गा हैल्ले मन्नोन, तेन-हिन्नाल कि इम्माट बिश्वास कीकीट। 16 दट, ओन-करूम दाकट। थोमा-येमाल तनवोड़ संगवालेड़कुन इत्तुलः— अपुन भी हन्जी ओन-संगने साईकट।

17 यीशु अवसी हत्तुल ते मालूम आसी हत कि नालुंग् दियांग् आतुंग् कि लाजरतुन मिस्सी सीतुड़। 18 बैथन्याह नार यरूशालेम शहरताल अन्दाजन कोस मेंड लक आन्द। 19 वल्ले यहूदीड़ मरथा अनि मरयम-ना इग्गा अवेनोल भाईन्-हिन्नाल तसल्ली सीयाले वासीतोड़। 20 यीशुना वायाना खबर केन्ची मरथा ओनसे मिले मायीले पसीसी हत, पर मरयम रोत्-रोपा उदसी रहे मात। 21 मरथा यीशुन इन्दा लातः— ये प्रभुनी, इग्गा मन्नेनी ते नावोल भाई हैल्ले सायेल। 22 अनि पुत्तोना कि बड़ांगे भी परमेश्वरताल तलेहकाकी ते इंगा भी नीकुन सीयानुल। 23 यीशु इत्तुलः— नीवोल भाई पिस्सी तेदानुल। 24 मरथा इतः— अन्ना पुत्तोना कि आखिर दियाते पिस्सी तेदाना वकत ओल भी पिस्सी तेदानुल। 25 यीशु तान इत्तुलः— पिस्सी तेदाना अनि जीवन अन्ना आन्दान, ना-परों बोल बिश्वास कीयातोल ओल सासी भी दानुल ते ओंडे पिस्सानुल। 26 अनि पिस्सीकुन ना-परों बिश्वास कीयातोल ते बप्पोड़े हैल्ले सायोल। बड़ांग् इम्मा इद मान्दीत्-परों बिश्वास कीयातोनी? 27 अद ओन इतः— इंगी प्रभुनी, इम्मा मसीहनी, दुनियाते वायानवाले परमेश्वरतोल मरीनी आन्दी, अन्ना ईहन बिश्वास कीयातोना।

28 ईहन इन्जी अद मलसी तन्वा सेलाइ मरयमतुन अलग केईसी इतः— गुरुजी वातोल, नीकुन केईतोल। 29 इद केन्ची मरयम जल्दी तेदसी ओन-करूम हन्दाले पसीसी हत। 30 यीशु अप्पोइ-लगुस नाटेने हैल्ले अक्वोल पर मरथासे मिले मासीतोल अद जगाते रहे मासी मत्तोल। 31 रोते मरयमतुन तसल्ली सींदइ ओइ इद हूइसी कि अद जल्दी तेदसी पसीसी हत्ता तान-पिज्जा ताकसी हत्तुइ। ओइ समझे मान्दइ कि मिस्साना जगाते आड़ीले हन्दल। 32 मरयम यीशुन्-करूम अवत, अनि ओन हूइसी काल करीसी इतः— ये प्रभुनी, इग्गा मन्नेनी ते नावोल भाई हैल्ले सायेल। 33 ताना आड़ाना अनि संगवालेड़ा आड़ाना हइसी यीशु आतमाते घबड़े मातुल अनि ओना जीवा खूब नोई लात। 34 ओल इत्तुलः— ओन बेगा मिस्सी सीतोडीट? 35 ओइ इत्तुइः— दा प्रभुनी, हूइकी। 36 यीशुना कन्कने कानेहक वातुंगु, अनि लोगोइ इत्तुइः— हूइट, ओल ओन बाहन प्रेम कींदल। 37 पर बोडे इत्तुइः— ओल अन्धानांगु कन्कनुंगु चाँकको कीतोल, बड़ांगु ईहन हैल्ले कीसी सके मायोल कि एल हैल्ले सायेल? 38 यीशु फिर जीवाते घबड़े मासी मिस्साना जगाते अवतुल। 39 मिस्साना जगा चट्टानते मांडो मत्ता, मांडोत्-रोपा हन्दाना सर्री बन्द कीयाले फड़ा टॉन्गी इरसी मत्तोइ। यीशु इत्तुलः— टॉन्गीन बगल कीम्ट। साताना सेलाइ मरथाल इतः— ये प्रभुनी, इन्गा दाइंगीतोल, सायाना नालुंगु दियांगु आतुंगु। 40 यीशु तान इत्तुलः— विश्वास कीम अनि परमेश्वरता शक्ति हूइकी, आहन नीकुन इत्तोना कि हैल्ले? ओइ टॉन्गीन बगल कीतुइ। 41 यीशु कन्क तहची इन्दा लातुलः— ये दाऊनी, नीवा धन्यवाद आई इम्मा नावा केन्जतोनी। 42 अन्ना पुत्तान कि इम्मा सदा नावा केन्जीतोनी, पर इद भीड़-त्-हिन्नाल ईहन इन्जीतोना कि ओइ बिश्वास केवीइ कि इम्मा नाकुन राँहतोनी। 43 ईहन वंकसी फड़ा लेंगते इत्तुलः— ये लाजरनी, पसीसी वड़ा। 44 बोल सासी मत्तोल, ओल कैक कालकने दिक्ड़ी दाँहतल अनि टाँइइ-परों रुमाल दाँहतल पसीसी वातुल। यीशु ओइकुन इत्तुलः— खोले कीसी हन्दा सीम्ट।

45 मरयमत्-करूम लई यहूदीइ वासी मत्तोइ अनि एइ यीशुना इद काम हूइतुइ, ते वल्लेसोइ यीशुन्-परों बिश्वास कीया लातुइ। 46 पर दूसरोइ फरोसीइ-करूम हन्जी यीशुना इद कामता खबर सीतुइ।

47 फड़ोइ याजकोइ अनि फरीसीइ पन्चायत केईसी इन्दा लातुइः— बड़ांगु कीकट? एल वल्ले अजीब काम्क कीयातोल। 48 ओन छोड़े कीकोम ते सब लोग ओन-परों बिश्वास कीयानुइ, अनि रोमी-सरकारवालेइ वासी मावा मन्दिरतुन अनि मावा जातीतुन नाश कीयानुइ। 49 वोडूल कायफाल अद सालतोल पडोल याजक मत्तोल, एल ओइकुन इत्तुलः— इम्माट बड़ांगे भी हैल्ले पुनवीट। 50 समझे हैल्ले माईवीट कि वोडूल सबत्-हिन्नाल सायेल अनि पुरो जाती नाश हैल्ले आयो, इद मी-हिन्नाल ठीक आईवल? 51 कायफाल इद मान्दी अपनो मनताल हैल्ले



वंकोल, पर अद सालतोल फडोल याजक आसी नबूवत कीन्दुल कि यीशु मावा जातीत्-हिन्नाल सायानुल। 52 अनि वरै अद जातीत्-हिन्नाल हैल्ले, पर दूसरोंग जातींगुनाल भी परमेश्वरतोड़ लोगोड़कून अर्पा कीसी उन्दीते मिले कीयाले यीशुना सायाना आयान-परों मत्ता। 53 अन्दीताल ओड़ आपुसते ओन जाँकसी वाटीले सलाह कीन्दूइ।

54 तेन-हिन्नाल यीशु अदराटाल यहूदीड़ा-नड्डूम खल्लमखल्ला हैल्ले ताकोल, अग्गाटाल पसीसी डॉन्गुडा कचुडा देशते एफ़राईम पडोडा बद्दे शहरते हन्जी चेलालोड़कून अरी मन्दा लातुल।

55 यहूदीड़ा फसह पडोडा तेवहार आयान-परों मत्ता, तेवहारत्-मुन्ने देहातताल वल्ले यहूदीड़ यरूशालेम्ते शुद्धि कीयाले वातुड़। 56 ओड़ यीशुन पिङ्कन्दुइ अनि मन्दिरत्-रोपा निच्ची आपुसते इन्दुडः— बाहुन लागिता, तेवहारते वायानुल कि हैल्ले? 57 पडोड़ याजकोड़ अनि फरीसीड़ हुकुम सीसीतोड़ कि यीशु बेगा आन्दुल बोले पुन्दातोल ते वेहाट, अम्माट ओन बैयाकोम।

फ़सह तेवहारतुन सारूंग दियांगु रहे मातुंग ते यीशु बैथनयाह नाटेने **12** वातुल। लाजर भी अग्गा मंदुल, एल सासी मत्तोल अनि यीशु ओन जीवा सीसी तहची मत्तोल। 2 यीशुन्-हिन्नाल ओड़ जावा तैयार कीतुड़, मरथाल जावा तूसंद अनि लाजर यीशुन्-संगने तिन्दाले उदसी मत्तोल। 3 मरयम नालुंगु पल्लांगु फडा कीमतवाले जटामासीता खुशबूदार नी येची यीशुना कालकून-परों सोकसी वाटत, अनि तन्वा तलाडा चुट्टींगने ओना कालकून उसमी लात। पूरो रोते नीदा खुशबू फैले मासी हत। 4 पर चेलालोड़ा-नड्डूमतोल वोडूल यहूदा इस्कारयोती, (एल पिछाड़ी यीशुनोल बेइस्तानवाले बने मातुल) ओल इन्दा लातुलः— 5 इद खुशबूवाले नीदुन डेडा-नूर रूपयाने ममसी कंगालोड़कून बाड़ी हैल्ले सेवीट? 6 ओल कंगालोड़ा फिकर कीसी आहुन हैल्ले वंकोल, पर कल्ले मत्तोल अनि ओड़ा खजाना ओन-करूम मन्द, ओड़ खजानाते वाटन्दुइ ते ओल तंडसी येन्दुल। 7 यीशु ओन इत्तुलः— मन्दाकाड़ी नावा मिस्साना दियात्-हिन्नाल कीता। 8 कंगालोड़ हमेशा मी-नड्डूम मन्दातोड़, अन्ना सब दिन हैल्ले मन्नोन।

9 वल्ले लोगोड़कून मालूम आत कि यीशु बैथनयाहते वातोल, ते ओड़ भी अग्गा वातुड़, यीशुन्-हिन्नाल भी अनि लाजरतुन हूडीले भी बोना सायान्-पिज्जा यीशु ओन ओंडे पिसूहची मत्तोल। 10 फडोड़ याजकोड़ लाजरतुन भी जाँकसी वाटीले सलाह कीया लातुड़, 11 बाड़ीकि ओन्-हिन्नाल लई यहूदीड़ ओड़कून छोड़े कीसी यीशुन्-परों बिश्वास कीन्दुइ।

12 तेवहारते पडा भीड कीसी वासी मत्तोड ओड दूसरो दिया यरूशालेमते यीशुना वायाना खबर केन्जतुड, ते छीन्दी आकींग् येची ओनसे मिले माईले पसीसी हत्तुड। फडा लेंगते चिचे माया लातुडः-

13 "होशिन्ना, धन्य आन्दुल इसराएलनोल राजाल,  
ओल प्रभुना पडोडे वाईतोल"।

14 बोले यीशुन्-करूम गदहा तत्तोल अनि यीशु तान्-परों उदसी हत्तुल। इद आहन आत बाडी कि शास्त्रते ईहन लिखे माता कि

15 "ये सीयोनता मीयानी, वरीमा,  
हडा, नीवोल राजाल गदहान्-परों उदसी वाईतोल"।

16 ओनोड चेलालोड अप्पोड इव मान्दीनुंग् हैल्ले समझे मायोड, पर यीशुना महिमा उजागर आयान्-पिज्जा ओडा ख्यालते वात कि ओन-संगने ईहन कीसी मत्तोड बाहुन शास्त्रते लिखे मासीता। 17 अनि लाजरना सायान-पिज्जा मिस्साना जगात्-रोपाटाल केईसी ओन ओंडे पिसूहच्ची सीयाना वकत यीशुन्-संगना भीडतोड लोगोड भी इद मान्दीना खबर सीन्दुड। 18 यीशुना इद अजीब कामता खबर केन्ची फडा भीड कीसी ओनसे मिले मायीले पसीसी हत्तुड। 19 तेन-हिन्नाल फरीसीड आपुसते इन्दा लातुडः- मासे बडांगे हैल्ले बने मायो, हडाट, तमाम दुनिया ओन-पिज्जा ताकीता।

20 तेवहारते कर्वे कीयाले दूसरो जातिवालेड भी बोडे बोडे वासीतोड। 21 एड गलीलता बेथसैदा-शहरतोल फिलिपुस्त-करूम वासी इत्तुडः- श्रीमानजी, अम्माट यीशुन्से मिले मासी मान्दी कीया आईतोडाम। 22 फिलिपुस वासी अन्द्रियासतुन वेहची सीतुल अनि रंटे यीशुन वेहची सीतुड। 23 यीशु ओडकन जवाब सीतुलः-

24 बनिआदमनोल मरीना महिमा उजागर आयाना घडी इन्गा वासी हत्ता।  
अन्ना मीकून सच्चो इन्दातोना -

गाँहकना दाना तोडीते हैल्ले अरवल अनि हैल्ले साईवल  
ते वरें उन्दी ही दाना मनवल,  
पर साईता अनि वल्ले गाँहक सादिता।

25 बोले वरें तन्वात्-हिन्नाल जीवन खर्च कीसी मन्दातोल  
ओल अपनो जीवातुन नाश कीयानुल  
इद दुनियाते बोले तन्वा जीवातुन ना-हिन्नाल खर्च कीसी मन्दातोल  
ओल हमेशाता जीवन्त्-हिन्नाल तन्वा जीवा इरसी पिस्सानुल।

26 बोल नावा सेवकाई कीया आईतोल ना-पिज्जा वाईल,  
बेगा अन्ना आन्दान अग्गा नावोल सेवक भी आयानुल।  
नावोल दाऊ भी नावा सेवकाई कीयानवालेन मन्जूर कीयानुल।

27 इन्गा नावा जीवा घबड़े माईता - बड़ांग् इन्दाका?

ये दाऊनी, इद घड़ीताल नाकून पिस्सूहा?

पर इद दुखता घड़ीत्-हिन्नाल ही अन्ना वातोना।

28 ये दाऊनी, नीवा पड़ोडा महिमा उजागर कीम।

अनि आगासताल लेंग वासी इत:- महिमा उजागर कीतान अनि ओंडे भी कीका। 29 ईहून लेंग केन्ची भीड़ते बोड़े इत्तुड़:- बादुड़ गरजीतांग्। ओंडे बोड़े इत्तुड़:- परमेश्वरतोल दूत ओनसे मान्दी कीतोल। 30 यीशु ओड़कून इत्तुल:- इद लेंग ना-हिन्नाल हैल्ले वायो पर मी-हिन्नाल वाता।

31 इन्गा इद दुनियाता न्यायता घड़ी वाता

इन्गा इद दुनियातोल राजान टंडसी वाटका।

32 नाकून धरतीताल परों तरूहतानुड़

अनि अन्ना सब लागोड़कून ना-खाक वीन्जका।

33 ईहून इन्जी ओल वेहन्दुल कि बाहून सायका। 34 भीड़तोड़ लोगोड़ ओन इत्तुड़:- कानूनते केन्जतोड़ाम कि मसीह सब दिन मन्दानुल, ते इम्मा बबाह इन्दातोनी कि बनिआदमनोल मरीं आसी नीकून तरूहतानुड़? 35 बोल आन्दुल एल बनिआदमनोल मरीं? यीशु ओड़कून इत्तुल:-

वेर्ची मी-नड्डूम इंगा थोड़ो ही दियांग् मन्दाता

वेर्ची मन्दाता अप्पोड़-लुगुल ताकसी दाकट

हैल्ले आयो कि मी-परों सिकाटी आसी दल।

अनि सिकाटीते ताकीतोल बेगा हन्दा हैल्ले पुन्नोल।

36 वेर्ची मी-नड्डूम मन्दाता अप्पोड़-लुगुस वेर्चीत्-परों बिश्वास कीम्ट

ते इम्माट वेर्चीतोड़ लोगोड़ीट आसी दाकीट।

ईहून वंकसी यीशु अग्गाटाल पसीसी हत्तुल, अनि बेगा हत्तोल ओड़ पुन्नोड़ हैल्ले।

37 ओल ओड़कून-सामो इच्चोंग् अजीब काम्क कीसीतोल तौभी ओड़ ओन-परों बिश्वास हैल्ले केवोड़। 38 यशायाह-नबीना इद मान्दी ईहून पूरो आसी हत कि:-

ये प्रभुनी -

अम्माट केन्जतोड़ाम इद मान्दीना भरोसा बोल कीयानुल?

प्रभु तन्वा ताकतवाले काम्कना भेद बोन बते कीतोल?

39 तेन्-हिन्नाल ओड़ बिश्वास हैल्ले केवोड़, बाड़ीकि यशायाहना जरियाते परमेश्वर ओंडे इन्जीतोल कि:

40 अन्ना ओड़ा कन्कनुंग् बन्द कीतोना

अनि ओड़ा मन मोटो कीतोना

कि कन्कने तव्वोड़ हैल्ले

अनि मनते समझे हैल्ले मायोड़  
अनि ना-खाक हैल्ले मलसी वायोड़,  
कि अन्ना ओड़कन चंगो केवेना।

41 नबी आसीकन यशायाह यीशुना महिमा मुन्नेटाल हूडसीतोल अनि तेन्-हिन्नाल ओल यीशुना ईहन मान्दी कीन्दुल। 42 तौभी लईसोड़ महाजन लोगोड़ ओन-परो बिश्वास कीन्दुड़, पर फरीसीइसे वरीसी खुल्लमखुल्ला तन्वा बिश्वास हैल्ले माने केवोड़ बाड़ीकि वरीन्दुड़ कि माकन भजनता रोताल बाहरो कीयानुड़। 43 एड़ परमेश्वरता इज्जत कम अनि आदमीड़ा इज्जत ज्यादा चाहे मान्दुड़।

44 फिर यीशु फड़ा लेंगते इत्तुल:-

अगर बोले ना-परो बिश्वास कीयातोल  
ओल ना-परो हैल्ले

पर नावोल रॉहतानवालेन-परो बिश्वास कीयातोल।

45 अनि नाकन हूड़ीतोल

ओल नावोल रॉहतानवालेन भी हूड़ीतोल।

46 अन्ना वेचो आसी दूनियाते वातोना

कि बोल ना-परो बिश्वास कीयातोल

ओल सिकाटीते हैल्ले मन्नोल।

47 अगर बोले नावा मान्दीनुंग केन्ची अच्वेन-लेखा हैल्ले केवोल

अन्ना ओन दोषी हैल्ले ठहरे केवोन -

दूनियातुन दोषी ठहरे कीयाले हैल्ले वायोन

पर दूनियातुन पिस्सूहताले वातोना।

48 अगर बोले नाकन मन्जूर हैल्ले केवोल

अनि नावा मान्दीत्-परो ध्यान हैल्ले सेवोल

ओन दोषी ठहरे कीयानवाले आन्दुल -

नावा इव मान्दींग् आखिरी दियाते

ओन दोषी ठहरे कीयानुंग्।

49 अन्ना नावा मन-ताल हैल्ले वंकोन,

नावोल रॉहतानवाले दाऊ नाकन हुकूम सीतोल

कि बड़ांग् बड़ांग् वंकी सीयाना।

50 अनि पुत्तोना कि ओना हुकूमता जरियाते

लोगोड़कन हमेशाता जीवन पुटिता।

बड़ांग् बड़ांग् वंकीतोना

इद दाऊहड़ाना हुकूमत्-लेखा आन्द।

13 फ़सह-तेवहारत्-मुन्नेता दिया मत्ता। यीशु पुत्तुल कि दनियाताल दाऊहड़ान्-करूम हन्दाना घड़ी इन्गा वासी हत्ता। दनियातोड़ बोड़ ओनोड़ आतुड़ ओडकन सब दिन प्रेम कीन्दुल अनि आखिर-लुगुस भी प्रेम कीतुल।

2 नल्पे ओड़ साड़ी तिन्दुड। शमोन-इस्करयोतीनोल मरीं यहूदाना मनते यीशुन बैस्ताले शैतान विचार वाटसी मत्तोल। 3 यीशु पुत्तुल कि दाऊ नाकन पूरो काम्त-हिन्नाल शक्ति सीतोल अनि कि परमेश्वरताल वासीतोना अनि परमेश्वरत्-करूम हन्दातोना। 4 ओल तेची कमीज रेहतुल अनि अन्गोछा येची नत्री दौहतुल। 5 तस्लाते येर वाटसी चेलालोड़ा काल्कनुंगु नॉरीं लातुल अनि अन्गोछाते उसमी लातुल। 6 आहन कीना कीनाके शमोन-पतरस्तु-करूम अवतुल। पतरस इन्दा लातुल:— ये प्रभुनी, नावा काल्कनुंगु नॉरींतोनी? 7 यीशु ओन जवाब सीसी इत्तुल:— बड़ांगु कीयातोना इम्मा इन्गा हैल्ले पुनवी, पर पिज्जा समझे माईकी। 8 पतरस इत्तुल:— नावा काल्कनुंगु बप्पोड़े मिनी नॉरमा। 9 यीशु जवाब सीतुल:— नीकन हैल्ले नॉरोंन ते इम्मा नावोल चेलानी हैल्ले मनवी। शमोन-पतरस ओन इत्तुल:— ये प्रभुनी, वर नावा काल्कनुंगु हैल्ले पर कैकनुंगु भी अनि तल्बडुन भी नॉरसी सीम। 10 यीशु इत्तुल:— बोल येर कीसी वातोल ओन काल्कनुंगु छोड़े कीसी ओंडे नॉराना हैल्ले अरों, पूरों तरहते सफ़ा आन्दुल — इम्माट भी सफ़ा आन्दीट, पर सब हैल्ले। 11 ओल तन्वोल बेइस्तानवालेन चीने मान्दुल अनि इत्तुल कि सफ़ा आन्दीट पर सब हैल्ले।

12 ओड़ा काल्कनुंगु नॉरसी दिक्ड़ी करींसी येतुल अनि उदसीं ओड़कन इत्तुल:— बड़ांगु इम्माट समझे माईतोड़ीट कि अन्ना मी-संगने बड़ांगु कीतोना? 13 इम्माट नाकन गुरु अनि प्रभु इन्दातोड़ीट ते ठीक आन्द, अन्ना आहन्ने आन्दान। 14 मीवोल प्रभुना अनि गुरुना आसी मीवा काल्कनुंगु नॉरतोना ते मीकन भी वोडुल दूसरोना काल्कनुंगु नॉराना चाहिये। 15 मीकन नमूना दीसहूची सीतोना कि इम्माट भी आहन कीकीट। 16 सच इन्दातोना, नौकर मालिकसे फड़ोल डैल्ले आयोस, बोल खबर सीयाले राँहतल आन्दुल तन्वोल राँहतानवालेसे फड़ोल हैल्ले अख्योल।

17 इंगा इद मान्दी पुत्तोड़ीट, आहन कीकीट ते मीवा जीवा खुश आयल। 18 मी सब्त-हिन्नाल हैल्ले वंकोन, बोन बोन आचतोना ओड़कन पुत्तोना। शास्त्रेत्ता इद मान्दी भी पूरो आसी दल कि:— ना-संगने साड़ी तिन्दाले उदतोल ओल नावा खिलाफ़ आसी हत्तोल। 19 आयान-मुन्ने अन्ना मीकन इद मान्दी वेहतातोना, कि आसी दल अनि बिश्वास कीकीट कि अन्ना ओल सदा मन्दानवालेना आन्दान।

20 अन्ना मीकून सच सच इन्दातोना:-

अन्ना बोन रॉहतातोना बोले ओन मन्जूर कीयातोल

ओल नाकून भी मन्जूर कीयातोल।

बोल नाकून मन्जूर कीयातोल

ओल नावोल रॉहतानवालेन भी मन्जूर कीयातोल।

21 ईहन वंकसी यीशुना जीवा घबड़े मात अनि ओल साफ वेहची सीतुल:-  
मी-नड्डूमतोल बोले नाकून बेईस्तानुल। 22 चेलालोड़ जीवाते शक कीया लातुड़  
कि बोन-हिन्नाल वंकीतोल, अनि ओड़ वोड़ल-दूसरोना खाक हूडीलातुड़।  
23 वोड़ल चेलाल - यीशुनोल खास प्यारोल - यीशुन-करूम उदसीतोल.  
24 अनि शमोन-पतरस ओन इशारा कीसी इत्तुल:- पूछे कीम, बोन-हिन्नाल  
वंकीतोल? 25 ते ओल यीशुन-करूम आसी पूछे कीतुल:- ये प्रभुनी, बोल आन्दुल?  
26 यीशु जवाब सीतुल:- इद साड़ीना टुकड़ा नाहची बोन सीयातोना ओले  
आन्दुल। अनि टुकड़ा नाहची शमोन-इस्कारयेतीनोला मरीं यहूदान सीतुल।  
27 टुकड़ा येता-बरोबर शैतान यहूदान-रोपा पदसी हत्तुल। यीशु यहूदान इत्तुल:  
नीकून बड़ांग् कीयाना आन्द तेन जल्दी कीम। 28 दूसरोड़ चेलालोड़ हैल्ले पुन्नोड़  
कि यीशु यहूदान बाड़ी ईहन इत्तुल। 29 बोड़े इद समझे मान्दुड़ कि यहूदान-करूम  
खजानाना मंदान-से यीशु ओन तेवहारत्-हिन्नाल जरूरी सामान तताले या  
कन्गालोड़कून बड़ांगे सीयाले रॉहतातोल। 30 साड़ीना टुकड़ा तिन्जी यहूदा पड़कने  
पसींसी हत्तुल। नरका आसी मत्ता।

31 यहूदाना हन्दान-पिज्जा यीशु इत्तुल:-

इन्गा बनि-आदमनोल मरींना सन्मान आता,

अनि ओना जरियाते परमेश्वरता भी सन्मान आता।

32 ओना जरियाते परमेश्वरता सन्मान आईता

ते परमेश्वर बेनि-आदमनोल मरींना भी सन्मान कीस्तानुल,

अनि पड़कने कीस्तानुल।

33 ये प्यारोड़ भार्डडीट,

इन्गा थोड़ो देर ओंडे भी-नड्डूम मन्दाकी।

नाकून पिड़काकीट पर बेगा अन्ना दाका

अग्गा मी-से हन्दाना हैल्ले आयो -

अन्ना यहूदीड़कून भी इन्जीतोना अनि

इन्गा मीकून भी आहन इन्दातोना।

34 मीकून नयो हुकूम सीयातोना -

आपूसते प्रेम इराट।

बाहुन अन्ना मी से प्रेम इरतोना

आहुन आपुसते प्रेम इराट।

35 आपुसते प्रेम इराकीट ते इद हूडसी संब चीने मायानुड  
कि इम्माट नावोड चेलालोडीट आन्दीट।

36 शमोन-पतरस ओन इत्तुलः— ये प्रभुनी, बेगा दाकी? यीशु ओन जवाब  
सीतुलः— अन्ना बेगा दाका, इन्गा ना-संगने अग्गा हन्दाना मी-से हैल्ले आयो। पर  
पिज्जाडे ना-पिज्जा वाईकी। 37 पतरस ओन इत्तुलः— ये प्रभुनी, नी-संगने इन्गा  
बाडी हैल्ले वायोन? अन्ना तो नी-हिन्नाल जीवा भी सीयाले तैयार आन्दान।  
38 यीशु जवाब सीतुलः— ना-हिन्नाल जीवा सीकी? अन्ना नीकून सच सच  
इन्दातोना, कॉर्रकुस्त-मुन्ने इम्मा मून्द मेला नावा इन्कार कीकी।

इम्माट जीवाते मिनी घबडे माईमाट —

**14** 2 परमेश्वरता भरोसा कीम्ट अनि नावा भी भरोसा कीम्ट।

नावोल दाऊना रोते मन्दाना जगांगु लईसोंगु आन्दुंगु,  
हैल्ले मन्वांगु ते मीकून बते केवेना।

अन्ना मी-हिन्नाल जगा तैयार कीयाले दाका।

3 मी-हिन्नाल जगा तैयार कीसी मलसी वाईका

अनि मीकून ना-संगने मन्दाले वोईका

कि बेगा मन्दातोना अग्गा इम्माट भी मन्दाकीट।

4 बेगा हन्दातोना अग्गाता सर्री इम्माट पुन्दातोडीट।

5 थोमा ओन इत्तुलः— ये प्रभुनी, बेगा दाकी पुन्नोम हैल्ले ते सर्री बाहुन  
पुन्दाकोम? 6 यीशु जवाब सीतुलः—

सर्री अनि सच्चाई अनि जीवा अन्नाई आन्दान,

ना-मीचुक बोले दाऊन-करूम हैल्ले वायोल।

7 नाकून चीने मायेडीट ते नावोल दाऊन भी चीने मायेडीट,

इंगावेनाल ओन चीने मातोडीट अनि ओन हूडतोडीट।

8 फिलिपुस ओन इत्तुलः— ये प्रभुनी, माकून दाऊन दीसूहा ते ओंडे हैल्ले  
तलेहकोम। 9 यीशु जवाब सीतुलः— इच्चोंगु दियानाल मी-संगने मन्दातोना अनि  
नाकून हैल्ले चीने माईवी, फिलिपुसनी?

नाकून हूडाना इद नावोल दाऊन भी हूडाना आन्द,

ते बाहुन इन्दातोनी कि माकून दाऊन दीसूहा?

10 नावा ईताल भरोसा हैल्ले केवी

कि अन्ना दाऊन-रोपा आन्दान अनि दाऊ ना-रोपा आन्दुल?

अन्ना मीकून मान्दी कीयातोना

इद मान्दी नावा मन-ताल हैल्ले आयो

पर दाऊ ना-रोपा मन्जी तन्वा काम कीयातोल।

11 अन्ना दाऊन्-रोपा आन्दान अनि दाऊ ना-रोपा आन्दुल -

नावा इद मान्दीना भरोसा कीम्ट,

हैल्ले ते नावा काम्कनुंग् हूड्सी भरोसा कीम्ट।

12 अन्ना मीकून सच सच इन्दातोना,

नावा भरोसा कीयानवाले भी आहून काम कीयानुल,

इन्गी, इक्वेन-से भी माईसी काम कीयानुल,

बाड़ीकि अन्ना दाऊन्-करूम दाका।

13 इम्माट नावा पड़ोल येची बड़ांगे भी तलेहकेडीट

ते अन्ना आहून कीका

कि अन्ना मरीं आसी नावोल दाऊना सन्मान दीसूहेना।

14 नावा पड़ोल येची ना-से बड़ांगे भी तलेहकाकीट ते कीका।

15 नाकून प्रेम केवेडीट ते बाहून अन्ना मीकून इत्तोना आहून केवेडीट

16 अनि अन्ना दाऊना अरदास कीका

अनि ओल वोडुल दूसरोल मदद सीयानवाले मीकून सीयानुल,

एल सदा मी-संग् मन्दानुल -

17 ओल आन्दुल सच्चार्इता आत्मा,

दुनिया ओन माने हैल्ले केवो

बाड़ीकि ओन हूडो भी हैल्ले अनि पुन्नो भी हैल्ले।

इम्माट ओन पुन्दातोडीट

बाड़ीकि ओल मी-संग् आन्दुल अनि मी-रोपा मन्दानुल।

18 मीकून सहारात्-मीचुक छोडे कीसी हैल्ले हन्नोन,

अन्ना मी-करूम मलसी वाईका।

19 थोडो देरते दुनिया नाकून हैल्ले हूडो, पर इम्माट नाकून हूडकीट,

अन्ना पिस्साका अनि इम्माट भी पिस्साकीट।

20 अद नेटी पुन्दाकीट कि अन्ना नावोल दाऊन-रोपा आन्दान,

अनि इम्माट ना-रोपा आन्दीट अनि अन्ना मी-रोपा आन्दान।

21 बोल नावा हक्क केन्ची माने कीयातोल

ओले नाकून प्रेम कीयातोल।

बोल नाकून प्रेम कीयातोल ओन नावोल दाऊ प्रेम कीयानुल,

अन्ना भी ओन प्रेम कीका अनि ओन-करूम वाईका।

22 यहूदा - "इस्कारयोती" पड़ोडोल हैल्ले - ओन इत्तुल:- ये प्रभुनी, इद बड़ांग् मान्दी आन्द कि इम्मा मा-करूम वाईकी पर दुनिया नीकून हैल्ले हूडो?



23 यीशु ओन जवाब सीतुलः—

बोले नाकून प्रेम केवेल ते नावा मान्दीत्-परों ताकेल।  
 नावोल दाऊ ओन प्रेम कीयानुल,  
 अनि अम्माट ओन-करूम वासी ओन-संग् मन्दाकोम।

24 बोल नाकून प्रेम हैल्ले केवोल ते नावा मान्दीत्-परों हैल्ले ताकोल।

इम्माट इद मान्दी केन्जीतोड़ीट, इद वरें नावा ही मान्दी हैल्ले,  
 इद नावोल दाऊना मान्दी आन्द, ओल नाकून रॉहची सीतोल।

25 मी-संग् मन्ना-मन्नाके इव मान्दींग् मीकून वंकसी सीतोना।

26 मदद सीयानवाले पवित्र आत्मा

ना-हिन्नाल दाऊ ओन रॉहची सीयानुल,  
 ओल मीकून इव मान्दींगना पूरो मतलब करेहतानुल  
 ओल इव सब मान्दींगना सुमरन मीकून सीयानुल।

27 मीकून "शान्ति" इन्जी छोड़े कीसी दाका,

पर दुनियात्-लेका "शान्ति" हैल्ले सेवोन।

नावा ही जीवात्-रोपाता सच्चो शान्ति मीकून सीया आईतोना  
 इद्दे मी-हिन्नाल नावा दान आन्द।

जीवाते चिन्ता मिनी केमाट, मिनी वरीमाट।

28 नावा इद मान्दी केन्जतोड़ीट कि दाका अनि मलसी भी वाईका,

नाकून प्रेम केवेड़ीट ते इद पुन्जी खुश आयेड़ीट

कि आना दाऊन्-करूम हन्दातोना —

दाऊ ना-से फड़ोल आन्दुल।

29 आसी हन्दान-मुन्ने इन्गा मीकून वेहतोना,

कि आसी दल अनि बिश्वास कीकीट।

30 इन्गा ओंडे वल्ले मान्दींग् कीयाना मौका हैल्ले आयो,

बाड़ीकि इद दुनियातोल राजाल वाईतोल।

ना-परों ओना बड़ांगे अब्रतियार हैल्ले।

31 पर दुनिया पुन्नेल कि अन्ना दाऊन प्रेम कीयातोना

अनि ओना हकुम्त्-लेका सब कीयातोना,

तेन-हिन्नाल इद सब आईता।

तेदट, इग्गाटाल दाकट।

1 अंगुडा सच्चो मड़ाना आन्दान,

**15** अंगुडा बगीचाते नावोल दाऊ माली आन्दुल।

2 कायांग हैल्ले सादोंग ईतांग् नावांग् कोहक नर्कसी वाटीतोल,

15.3-15

- कायांग् सादीतांग् ईतांग् कोहक चॉककोंग् कीयातोल  
कि अव ओंडे कायांग् सादवांग्।
- 3 मीकुन वंकसी सीतान इद मान्दीते इम्माट इन्गाई चॉकको आतोड़ीट।
- 4 ना-से लगे मासी मन्ट अनि अन्ना मी-से लगे मासी मन्दाका।  
मड़ाता कोर अलग आसी कायांग् हैल्ले सादो  
मड़ाते लगे मासी मन्दाता अनि सादीता।  
आहुन इम्माट भी ना-से अलग आसी हैल्ले सादवीट।
- 5 अंगुडा मड़ाता आन्दान, कोहक इम्माट आन्दीट।  
ना-से लगे मासी मन्दातोल अनि अन्ना ओन-से,  
ओल वल्ले कायांग् सादानुल।  
पर ना-से अलग आसी मी-से बड़ांगे हैल्ले बने मायो।
- 6 ना-से जोड़े मासी हैल्ले मन्नोल कोत्-लेका फेंके मासी वच्ची हन्दातोल।  
ईतांग् कोहकमंग् अर्पा कीसी किसते वाटीतोड़ अनि अव कडूसी हन्दातांग्।
- 7 ना-से जोड़े मासी मन्दाकीट अनि नावा मान्दी मी-रोपा मन्दल,  
ते बड़ांगे भी तलेहकाकीट अनि मी-हिन्नाल आसी दल।
- 8 मीवा जीवाते फड़ा फल आयान-से  
नावोल दाऊना सन्मान आईता,  
अनि इम्माट नावोड़ चेलालोड़ीट आईकीट।
- 9 बाहुन दाऊ नाकुन प्रेम कीयातोल  
आहुन अन्ना मीकुन प्रेम कीयातोना,  
नावा प्रेमते बने मासी मन्ट।
- 10 नावा हुकुम्क माने कीकीट ते नावा प्रेमते बने मासी मन्दाकीट,  
बाहुन अन्ना नावोल दाऊना हुकुम माने कीतोना,  
अनि ओना प्रेमते बने मासी मन्दातोना।
- 11 मीवा जीवाते नावात्-लेका पूरो पूरो खुशी आयान-हिन्नाल  
अन्ना मीकुन इव मान्दींग् वंकतोना।
- 12 इद नादा हुकुम आन्द.—  
बाहुन अन्ना मीकुन प्रेम कीतोना  
आहुन इम्माट आपुसते प्रेम कीम्ट।
- 13 सबसे फड़ा प्रेम इद आईता  
कि तन्वोड़ दोस्त-हिन्नाल बोले तन्वा जीवा सेवेल।
- 14 इम्माट नावा हुकुम्त्-लेका कीकीट  
अनि नावोड़ दोस्तनीट आन्दीट।
- 15 इंगा मीकुन "नौकर" हैल्ले वंकोन,  
नौकर पुन्नोल हैल्ले कि मलिक बड़ांग् कीयातोल;

- पर अन्ना मीकून दास्त कीसी वंकतोना  
बाड़ीकि दाऊनाल बड़ांग् बड़ांग् केन्जतान मीकून पूरो पूरो बेहतोना।
- 16 इम्माट नाकून हैल्ले आचवीट,  
पर बड़े मीसी मीवा जीवाते फड़ा फल, सदा मन्दानवाले फल, आईले  
अन्ना मीकून आचतोना अनि ठहरे कीतोना।  
तेन-हिन्नाल नावा पड़ोडे बड़ांगे भी तलेहकाकीट  
नावोल दाऊ मीकून सीयानुल।
- 17 इद आन्द नावा हकूम:-  
आपसते प्रेम इर्राकीट।
- 18 दुनिया मीकून पास्कीता ते इद पुन्ट  
कि मी-मुन्ने नाकून भी पास्कसी मत्ता।
- 19 दुनियातोड़ीट आयोड़ीट ते दुनिया मीकून अपनोत्-लेका प्रेम केवेल  
पर इम्माट इद दुनियातोड़ीट हैल्ले,  
अन्ना मीकून आची दुनियाताल अलग कीतोना,  
तेन-हिन्नाल दुनिया मीकून पास्कीता।
- 20 नावा इद मान्दीता ख्याल कीम्ट,  
कि मालिकसे फड़ोल नौकर हैल्ले आयोल।  
नावा बेला कीतोड़ ते मीवा भी बेला कीयानुड़,  
नावा मान्दी माने कीतोड़ ते मीवा भी माने कीयानुड़,
- 21 इम्माट नावोड़ आन्दीट तेन-हिन्नाल मीवा बेला कीयानुड़,  
नावोल रॉहता तालेन चीने हैल्ले मायोड़ तेन-हिन्नाल भी आहून कीयानुड़।
- 22 वासी ओड़कून हैल्ले वन्कोन ते ओड़ा पाप हैल्ले आयो,  
पर इंगा ओड़ा पाप्त्-हिन्नाल बड़े भी बहाना हैल्ले मन्नो।
- 23 बोल नाकून पास्कीतोल ओल नावोल दाऊन भी पास्कीतोल।
- 24 बातांग् काम्क बोले बप्पोड़े हैल्ले केवोल,  
अन्ना वासी ओड़-नड्डूम आतांग् काम्क कीतोना -  
अन्ना आहून हैल्ले केवेना ते पापता दोष ओड़कून हैल्ले लागवल,  
पर नावा काम्कनुंग् हूड़सी येतोड़  
अनि भी ओड़ नाकून अनि नावोल दाऊत भी पास्कीतोड़।
- 25 ओड़ा कानूनते ईहून लिखे माता:-  
"बेमतलब ओड़ नाकून पास्कीतोड़"  
इद मान्दी भी पूरो आयान्-हिन्नाल ईहून आसी हत्ता।
- 26 मदद सीयानवाले वायानुल,  
परमेश्वरता सच्चाई बते कीयानवाले आत्मा आन्दुल,

15.27-16.13

दाऊन-करूमटाल वाईतोल।

अन्ना ओन दाऊन-करूमटाल रॉहका,

ओल नावा गवाही सीयानुल।

27 अनि इम्माट भी नावा गवाही सीकीट,

बाड़ीकि नावा इद कामती शुरुताल ना-संगने रहे मातोड़ीट।

1 तेन-हिन्नाल मीकून इव मान्दींग् वंकतोना

**16** कि मीवा बिश्वास हैल्ले माड़ो।

2 भजनता रॉहकनाल मीकून टंडसी वाटानुड़

आहुन भी आसी दल कि बोले मीकून जाँक्सी वाटानुल

ते समझे मायानुल कि परमेश्वरता सेवकाई कीयातोना।

3 तेन-हिन्नाल ईहून कीयानुड़,

कि दाऊत चीने हैल्ले मायोड़ अनि नाकून भी चीने हैल्ले मायोड़।

4 पर इंगा अन्ना मीकून इद सब बते कीतोना,

कि ईहून घड़ीना वायान-परों इम्माट नावा मान्दी सुमरन कीकीट।

मुन्ने अन्ना हैल्ले वेहोन

बाड़ीकि मी-संग् मत्तोना।

5 पर इंगा नावोल रॉहतानवालेन्-इग्गा दाका,

अनि मी-नड्डुम बोले हैल्ले पूछे केवोल कि बेगा दाकी?

6 इंगा बते कीतोना अनि मीवा जीवा बाको दुखी आसी हत्ता।

7 पर नावा हन्दाना मी-हिन्नाल अस्सल आन्द,

हैल्ले हन्नेना ते सहारा सीयानवाले मी-करूम हैल्ले वायोल।

दाका ते ओन मी-करूम रॉहका।

8 ओल वासी दुनियातोड़ लोगोड़कून सफ़ा बते कीयानुल

कि पाप्त्-हिन्नाल अनि नेकीत्-हिन्नाल अनि न्याव्त्-हिन्नाल

ओड़ा विचार गलत आन्द।

9 पाप्त्-हिन्नाल तेन-से कि ना-परों विश्वास हैल्ले केवोड़

10 नेकीत्-हिन्नाल तेन-से कि अन्ना दाऊन्-करूम दाका

अनि इम्माट नाकून ओंडे हैल्ले हूड़वीट।

11 न्याव्त्-हिन्नाल तेन-से कि इद दुनियातोल राजाल दोषी ठहरे मातोल।

12 ओंडे वल्ले मान्दींग् मीकून इन्दाले रहे मातांग्

पर इंगा मीवा जीवात्-हिन्नाल ज्यादा भारी आयल।

13 परमेश्वता सच्चाई वेहतानवाले आत्मा वायानुल

अनि ओल मीकून पूरो सच्चाई ता सर्री बते कीयानुल।

ओल तन्वा ही मान्दी हैल्ले वंकोल,

बाहुन परमेश्वरताल केंजीतोल आहुन वंकानुल,  
अनि वायानवाले मान्दींग् वेहतानुल।

14 ओल नावा मान्दी येची मीकुन बते कीयानुल,  
अनि आहुन नावा सन्मान उजागर कीयानुल।

15 बडांग् दाऊना आन्द अद नावा भी आन्द,  
तेन्-हिन्नाल इत्तोना कि नावा मान्दी येची मीकुन बते कीयानुल।

16 थोड़ो समय अनि नाकुन हैल्ले हूड़वीट,  
अनि ओंडे थोड़ो समय आयल ते नाकुन ओंडे हूड़कीट।

17 बोडे बोडे चेलालोड़ आपुसते इन्दा लातुड़ः— इद बडांग् मान्दी आन्द?  
इन्दातोल कि थोड़ो समय नाकुन हैल्ले हूड़वीट अनि ओंडे थोड़ो समयते नाकुन ओंडे  
हूड़कीट, अनि कि दाऊन्-करूम दाका। 18 इद "थोड़ो समय" बडांग् आन्द,  
पुन्नोम हैल्ले बडांग् बडांग् वंकीतोल। 19 यीशु पुत्तुल कि पूछे कीया आन्दुड़, ते  
इत्तुलः— अन्ना इत्तोना कि थोड़ो समय नाकुन हैल्ले हूड़वीट अनि ओंडे थोड़ो  
समय आयल ते नाकुन ओंडे हूड़कीट, तेन्-हिन्नाल आपुसते पूछ-ताछ कीयातोड़ीट  
कि बाह?

20 अन्ना मीकुन सच सच इन्दातोना,  
इम्माट आइकीट अनि विलाप कीकीट, अनि दुनिया खुश आसी दल,  
इम्माट दुखी आइकीट पर मीवा दुख खुशीते बदले मासी दल।

21 माईना छौवा आईता अनि माईन दुख आईता,  
बाड़ीकि ताना दुखता घड़ी वासी हत्ता,  
पर छौवा पैदा आईता अनि माई तन्वा दुख मरेंगीता  
बाड़ीकि दुनियाते मनवल पैदा आतोल।

22 ईहुन मीकुन इंगा दुख आईता,  
पर अन्ना ओंडे मी-करूम वाईका अनि मीकुन बाको खुशी आयल,  
अद खुशी बोले हन्सूहची हैल्ले येनोल।

23 अद नेटी ना-से बडांगे भी पूछे हैल्ले केवीट।  
अन्ना मीकुन सच सच इन्दातोना, नावोड़ चेलालोड़ीट आसी,  
दाऊनाल बडांगे भी तलेहकाकीट ते नावा पड़ोडे सीयानुल।

24 इंगा-लुगुस नावोड़ चेलालोड़ीट आसी नावा पड़ोडे बडांगे हैल्ले  
तलेहकाकीट, तलेहकाट ते पटसी दल, कि मीवा खुशी पूरो आई।

25 अन्ना वेसोड़ीते मान्दी कीतोना,  
अद घड़ी वाईता कि वेसोड़ीते ओंडे हैल्ले वंकोन,  
पर खुल्लमखुल्लो दाऊना मान्दी वेहका।

16.26-17.4

26 अद नेटी नाबोड़ चेलालोड़ीट आसी ओना अरदास कीकीट,  
अन्ना हैल्ले इन्नोन कि मी-हिन्नाल ओना अरदास कीका।

27 दाऊ तन्ना मीकुन प्रेम कीयातोल  
बाड़ीकि इम्माट नाकुन प्रेम कीसी नावा भरोसा कीतोड़ीट  
कि अन्ना परमेश्वरताल पसीसी वातोना।

28 दाऊनाल पसीसी दुनियाते वातोना  
अनि इंगा दुनियातुन छोड़े कीसी दाऊन्-करूम दाका।

29 चेलालोड़ इत्तुड़:- हूडाट, इंगा सफा वन्कीतोनी, वेसोड़ीते हैल्ले वंकवी।

30 इंगा पुत्तोड़ाम कि नीकुन सब मान्दींग मालुम आन्दुंग्, बोले बड़ांगे पूछे कीयाना  
जरूरत हैल्ले, तेन-हिन्नाल भरोसा कीयातोड़ाम कि इम्मा परमेश्वरताल पसीसी  
वातोनी।

31 यीशु जवाब सीतुल:-

32 इंगा बिश्वास कीयातोड़ीट?  
केन्जाट, अद घड़ी वाईता, अनि इंगा भी वाता,  
कि इम्माट नाकुन वरौले छोड़े कीसी  
सब मीवा रॉहकने जोडसी दाकीट।  
पर अन्ना वरौना हैल्ले, दाऊ ना-संग् आन्दुल।

33 इव मान्दींग मीकुन इंगा वेहची सीतोना  
कि ना-से जोड़े मासी मीकुन शान्ति पुटवल,  
दुनियाते मीकुन दुख आसी दल,  
पर हिम्मत मिनी छोड़े केमाट,  
अन्ना दुनियातुन मईसी येतोना।

17 यीशु इव मान्दींग् वंकतुल अनि आगास्त-खाक हूडसी इत्तुल:-

- ये दाऊनी, घड़ी वासी हत्ता,  
नीबोल मरीना महिमा उजागर कीम  
कि मरी नीवा महिमा उजागर केवेल,  
2 इम्मा सारो इन्सान्क-परौ ओन अधिकार सीती  
कि बोड़ बोड़ ओन सीतोनी ओड़कुन हमेशाता जीवन सेवेल।  
3 नीकुन, वरौले सच्चोल परमेश्वरतुन, पुन्दाना,  
अनि नाकुन, नीबोल रॉहतोल यीशु मसीहन, पुन्दाना,  
तेन-से हमेशाता जीवन आईता।  
4 दुनियाते नीवा महिमा उजागर कीतोना,  
नाकुन कीयाले काम सीती तान पूरो कीतोना।

- 5 ये दाऊनी, दुनिया हैल्ले मन्नो अनि नावा नीसंग् महिमा मत्ता,  
आहुन इंगा भी नावा महिमा आया सीम।
- 6 दुनियाताल बोड़कुन इम्मा येची नाकुन सीती  
ओड़कुन नीवा पड़ोल वेहची सीतान।  
ओड़ नीवोड़ मत्तोड़, इम्मा नाकुन सीतोनी,  
ओड़ नीवा मान्दी माने कीतोड़
- 7 अनि पुन्जी येतोड़ कि बड़ांगे नाकुन सीतोनी सब नी-खाकनाल आन्द।
- 8 बड़ांग् बड़ांग् करेहताले नाकुन सीती अन्ना ओड़कुन सीतोना,  
अनि ओड़ तान माने कीसी पुन्जी येतोड़  
कि सच आन्द कि अन्ना नी-खाकनाल वातोना,  
अनि बिश्वास कीतोड़ कि इम्मा नाकुन राँहतोनी।
- 9 ओड़-हिन्नाल अन्ना प्रार्थना कीयातोना  
दुनियात्-हिन्नाल हैल्ले केवोन,  
पर ओड़-हिन्नाल बोड़ इम्मा नाकुन सीतोनी,  
बोड़ीकि एड़ नीवोड़ आन्दुड़।
- 10 बोड़ नावोड़ आन्दुड़ नीवोड़ भी आन्दुड़,  
अनि नीवोड़ भी नावोड़ आन्दुड़,  
अनि ओड़ा जरियाते नावा महिमा उजागर आईता।
- 11 इंगा अन्ना नी-करूम वाईका,  
अन्ना दुनियाते ओँडे हैल्ले मन्नोन, पर एड़ दुनियाते मन्दानुड़।  
ये पवित्र दाऊनी, नीवा पड़ोडे ओड़कुन पिस्सूहची इर्रो,  
अद्दे पड़ोल इम्मा नाकुन सीती,  
कि एड़ उन्दी आसी मन्दानुड़  
बाहुन अपलो भी उन्दी मन्दातोड़ट।
- 12 इम्मा नाकुन शक्ति सीती नीवा अद शक्तिते  
अन्ना ओड़-संग् मन्ना-मन्नाके ओड़कुन पिस्सूहची इरतोना।  
ईहुन पिस्सूहतोना कि बोले भी नाश हैल्ले आयोल,  
वर्रोले ओल, बोना नाश आयाना जरूरी मत्ता,  
कि शास्त्रता मान्दी पूरो आइवल।
- 13 इंगा अन्ना नीकरूम वाइतोना,  
अनि दुनियाते मन्ना-मन्नाके इव मान्दींग् तेन्-हिन्नाल वंकीतोना  
कि ओड़ा जीवाते नावा आनन्द पूरो आइवल।
- 14 नीवा मान्दी ओड़कुन सीतोना अनि दुनिया ओड़कुन पास्कसी सीन्द,  
बाड़ीकि दुनियातोड़ हैल्ले आयोड बाहुन अन्ना भी दुनियातोना हैल्ले।

17.15-18.2

- 15 दुनियाताल ओड़कून टंडसी येना ईहून अरदास हैल्ले केवोन,  
पर ईहून कि ओड़कून बुराईताल पिस्सूहची इरा।
- 16 अन्ना दुनियातोना हैल्ले आयोन ईहून ओड़ भी दुनियातोड़ हैल्ले।
- 17 सच्चाईते ओड़कून पवित्र ठहरे कीम,  
नीवा वचन सच्चाई आन्द।
- 18 इम्मा नाकून दुनियाते रॉहतोनी आहून अन्ना ओड़कून दुनियाते रॉहतोना।
- 19 अन्ना नाकून पवित्र कीयातोना  
तेन-हिन्नाल कि ओड़ भी सच्चाईते पवित्र आईड़।
- 20 वरें एड़-हिन्नाल हैल्ले पर ओड़-हिन्नाल भी अरदास कीयातोना,  
बोड़ एड़ा मन्दी केन्ची ना-परों विश्वास कीयानुड़।
- 21 ये दाऊनी, ओड़ सब उन्दी आईड़।  
ओड़ अप्लोत्-रोपा आहून मन्नीड़  
बाहून इम्मा ना-रोपा आन्दी अनि अन्ना नी-रोपा  
कि दुनिया बिश्वास केवल कि इम्मा नाकून रॉहतोनी।
- 22 बाहून इम्मा नाकून महिमा सीतोनी,  
आहून अन्ना ओड़कून महिमा सीतोना  
कि ओड़ उन्दी आईड़ बाहून अप्लो उन्दी आन्दट।
- 23 अन्ना ओड़-रोपा अनि इम्मा ना-रोपा,  
कि ओड़ पूरो रीती उन्दी मन्नीड़  
अनि दुनिया पुनवल कि इम्मा नाकून रॉहतोनी  
अनि ओड़कून भी प्रेम कीयातोनी बाहून नाकून प्रेम कीयातोनी।
- 24 ये दाऊनी, बच्चोड़ इम्मा नाकून सीतोनी  
ओड़ सब ना-संग् आईड़ बेगा अन्ना आईका,  
कि नावा अद महिमा हूड़ानुड़ बद इम्मा नाकून सीतोनी  
बाड़ीकि दुनियाता गढे मायान्-मुन्ने इम्मा नाकून प्रेम कीतोनी।
- 25 ये पवित्र दाऊनी, दुनिया नीकून हैल्ले पुन्नो,  
पर अन्ना नीकून पुन्दातोना,  
अनि एड़ पुन्जी येतोड़ कि इम्मा नाकून रॉहतोनी।
- 26 नीवा पहिचान ओड़कून सीतोना अनि ओंड़े सीका,  
कि ओड़-रोपा अद प्रेम आईवल बाहून नीवा ना-हिन्नाल आन्द,  
अनि कि अन्ना भी ओड़-रोपा मन्नेना।

ईहून प्रार्थना कीसी यीशु चेलालोड़-अरीं पस्सीसी हत्तुल, अनि  
**18** कीदरोन पड़ोडा नाला वरसी हत्तुल। अग्गा बगीचा मत्ता, अनि यीशु अनि  
चेलालोड़ बगीचाते सोड़ीसी हत्तुड़। 2 बेईस्तानवाले यहूदाल भी अद जगा पत्तुल,



बाड़ीकि यीशु अग्गा लई मेला चेलालोड़कून संगने हन्जी मत्तोल। 3 यहूदाल बगीचाते वातुल अनि ओन-संगु रोमी सरकारता पल्टन, अनि फरीसीड़ा खाकनाल अनि फड़ोड़ याजकोड़ा खाकनाल सिपाहीड़, ललटेन्क धुन्दरींगु अनि हतियार्क येची वातुड़। 4 यीशु पत्तल कि नाकून बड़ांग बड़ांग आसी दल, अनि ओल पसीसी इत्तुल:- बोन पिड़कीतोड़ीट? ओड़ जवाब सीतुड़:- नाजरेथ नाटेनोल यीशुन। 5 यीशु इत्तुल:- अन्ना आन्दान। बेईस्तानवाले यहूदाल ओड़-संगु निच्ची मत्तोल। 6 यीशुना "अन्ना आन्दान" केन्ची ओड़ सब पिज्जा सरके मासी धरतीत्-परो अरसी हत्तुड़। 7 यीशु ओंडे पूछे कीतुल:- बोन पिड़कीतोड़ीट? ओड़ इत्तुड़:- नाजरथ नाटेनोल यीशुन। 8 यीशु जवाब सीतुल:- अन्ना वेहतोना कि अन्ना आन्दान, नाकून पिड़कीतोड़ीट ते एड़कून हन्दा सीम्ट। 9 तेन-से ओना इद मान्दी सच आत कि:

"बच्चोड़ इम्मा नाकून सीतोनी बोले भी नाश हैल्ले आयोल"।

10 शमोन पतरस्तु-करूम तलवार मत्ता, ओल तान वीन्ची फड़ोल याजकनोल नौकडा जेवनो कौवदुन अस्कसी सीतुल। नौकडा पड़ोल मल्कुस मत्ता। 11 यीशु पतरसतुन इत्तुल:- तलवारतुन भियानते इरा - दाऊ नाकून दुखता प्याला उन्दाले सीतोल बाड़ी उन्नोन?

12 पल्टन अनि सूबेदार अनि यहूदीड़ोड़ सिपाहीड़ यीशुन बेईसी दाँहची येतुड़। 13 मुन्ने ओड़ ओन हन्नान्-करूम वोतुड़। हन्नाल अद सालनोल फड़ोल याजक कार्डफानोल मुड़ियाल मत्तोल। 14 एल ओले कार्डफाल मत्तोल ओल यहूदीड़कून सलाह सीतुल कि बोले सबत्-हिन्नाल सायेल अनि पूरो जाती नाश हैल्ले आयो ते ठीक आईवल।

15 शमोन पतरस अनि दूसरोल चेलाल रंटे यीशुन्-पिज्जा ताकसी हत्तुड़। एल दूसरोल चेलाल फड़ोल याजकनोल पहचानतोल मत्तोल, एल यीशुन्-संगु याजकना रचाडे सोड़तुल पर पतरस बाहरो किवाड-करूम रहे मातुल। 16 याजकनोल पहचानवाले चेलाल मलसी किवाडा केपानवाले माईन वंकसी पतरसतुन भी रोपा वोतुल। 17 माई पतरसतुन इत:- इम्मा भी एनोल चैलानी आन्दी कि हैल्ले? ओल जवाब सीतुल:- अन्ना तो हैल्ले आयोन।

18 पीनी अस्संद अनि नौकर्क अनि सिपाहीड़ कोयलाता किस परचे कीसी आरसी येन्दुड़। पतरस भी ओड़-करूम निच्ची किस आरन्दल।

19 फड़ोल याजक यीशुना पूछ-ताछ कीया लातुल कि नीवोड़ चेलालोड़ बोड़ बोड़ आन्दुड़, अनि इम्मा बड़ांगु बड़ांगु करेहतातोनी? 20 यीशु जवाब सीतुल:- दनियातुन खुल्लमखुल्लो वंकतोना, भजनता रॉहकने अनि मन्दिरते करेहची सीन्दान, अग्गा सब लोगोड़ इकट्टो आईतोड़, मकसी बड़ांगे हैल्ले वंकोन। 21 नावा बाड़ी पूछ-ताछ कीयातोनी? केन्जानवालेड़कून पूछे कीम, ओड़कून बड़ांगु बड़ांगु

वंकन्दान, ओड़ पुन्दातोड़। 22 ईहन इत्तुल अनि बोले सिपाही यीशुन तमाचा जीसी इत्तुल:- फडोल याजकुन बाहुन जवाब सीयातोनी? 23 यीशु इत्तुल:- बूरो वंकतोना ते सबतुन वेहा, अनि अस्सल वंकतोना ते बाड़ी जीयातोनी? 24 तेन-पिज्जा हन्नाल यीशुन दाँहतल दूसरोल फडोल याजकना कैदे अवेहची सीतुल, एना पडोल काईफाल मत्ता।

25 शमोन पतरस किस आरन्दुल ते बोड़े ओन पूछे कीतुड़:- इम्मा भी ओनोल चेलाल आन्दी कि हैल्ले? ओल इन्कार कीसी इत्तुल:-अन्ना तो हैले आयोन। 26 फडोल याजकनोल बोले नौकर अग्गा मत्तोल, एल ओनोल कुटुम्बवाले मत्तोल बोना काऊ पतरस अस्कसी मत्तोल। एल पतरसतुन इत्तुल:- बगीचाते ओन-संग् नीकुन हूड़तान कि हैल्ले? 27 पतरस ओंडे इन्कार कीतुल, अनि पडकने कॉर कूस्त।

28 दिन पसीनाके काईफाना रोताल ओड़ यीशुन रोमी सरकारना भवन्त-रोपाता अदालत-खाक वोतुड़। यहूदीइ भवन्त-रोपा हैल्ले हन्नोड़, बाड़ीकि इन्दुड़ कि नापाक हैल्ले आईवट, फसह-तेवहार तिन्दाकट। 29 रोमी सरकार पिलातुस बाहरो वातुल अनि इत्तुल:- एल बड़ांग् कीतोल? ओड़ जवाब सीतुड़:- जुल्म हैल्ले केवोल ते नीकरूम हैल्ले तड़ोम। 30 पिलातुस ओड़कुन इत्तुल:- इम्माट वोसी मीवा कानूनते ओना फैसला कीम्ट। 31 यहूदीइ इत्तुड़:- सायाना सजा सीयाना माकुन हुकुम हैल्ले। 32 यीशु मुन्नेताल वेहची मत्तोल कि बाहुन साईका, अनि ईहन ओना मान्दी सच पसीत।

33 पिलातुस भवन्त-रोपा मलसी यीशुन केइसूहची इत्तुल:- बड़ांग् इम्मा यहूदीडोल राजानी आन्दी? 34 यीशु जवाब सीतुल:- बड़ांग् इम्मा नीवा मनताल ईहन पूछे कीयातोनी, कि ओंडे बोड़े नीकुन इत्तुड़? 35 पिलातुस इत्तुल:- यहूदीना आन्दान बाह? नीवोड़ जातीवालेइ अनि याजकोड़ नीकुन नावा कैदे सीतोड़। बड़ांग् कीतोनी? 36 यीशु जवाब सीतुल:- नावा राज इद दुनियाता हैल्ले, दुनियाता आईवल ते नावोड़ सिपाहीड तड़हूची नाकुन यहूदीडा कैदे हैल्ले वाया सेवेइ, पर नावा राज इग्गाता हैल्ले आयो। 37 पिलातुस इद केन्ची ओंडे पूछे कीतुल:- बाड़ी, इम्मा राजानी आन्दी बाह? यीशु जवाब सीतुल:-

इम्मा इन्दातोनी कि अन्ना राजाना आन्दान।

तेन-हिन्नाल अन्ना पैदा आतोना,

तेन-हिन्नाल अन्ना इद दुनियाते वातोना,

सच्चाईता मान्दी वेहची सीयाले।

38 बोल सच्चाईतोल आन्दुल ओल नावा मान्दी केन्जीतोल।

पिलातुस ओन इत्तुल:- सच्चाई बड़ांग् आईता? तेन-पिज्जा पिलातुस बाहरो मलसी लोगोड़कुन इत्तुल:-

39 नाकुन ओना बड़ांगे जुल्म हैल्ले दीसो। फसह तेवहाडे हर साल मी-हिन्नाल

वोड्डल केंदीन छोडे कीयाना रिवाज आईता, इम्माट मीवा मरजी बते कीम्ट, बड़ांग् यहूदीडोल राजान छोडे कीका? 40 ओड़ ओंडे चिचे मासी इत्तुडः— एन हैल्ले, बरब्बान छोडे कीम। बरब्बा डाकू मत्तोल।

पिलातुस यीशुन अलग कीसूहची कोडलांग् जीस्तुल। 2 सिपाहीड 19 साहकना पगड़ी दोंहची यीशुना तल्लाड्-परों दस्सी सीतुड् अनि लाल-नीलो\* रंग्वाले दिकडी करसूहची सीतुड्। ओड़ ओन्-करूम वासी इन्दुडः— ये यहूदीडोल राजानी — सेवा। 3 अनि ओड़ ओन रहपट्-जीन्दुड्। 4 पिलातुस ओंडे पसीसी लोगोडकून इत्तुलः— हूडाट, ओन मी-सामनो निलुहत्तातोना, इम्माट पुन्ट कि नाकून एना बड़ांगे जुल्म हैल्ले दीसो। 5 ईहन यीशु साहकना पगड़ी अनि लाल-नीलो दिकडी करीसी पसीसी वातुल। 6 पिलातुस ओड़कून इत्तुलः— हूडाट, एल आन्दुल। पड़ोड याजकोड अनि यहूदीड ओन हूडसी चिचे मासी पड़ा लेंगते वंकी लातुडः— सूलीत्-परों तरूहची सीम सूलीत्-परों तरूहची सीम। पिलातुस ओड़कून इत्तुलः— वोम्ट, इम्माटई ओन सूलीत्-परों तरूहट, — नाकून ओना बड़ांगे जुल्म हैल्ले दीसो। 7 यहूदीड जवाब सीतुडः— मावा भी कानून आन्द, मावा कानूनते ओल सायाना सजात्-लायोक आन्दुल, बाडीकि ओल तन्वातुन परमेश्वरतोल मरी बने कीतोल। 8 पिलातुस इद केन्ची ओंडे भी वरीता लातुल। 9 ओल भवन्त्-रोपा मलसी यीशुन इत्तुलः— इम्मा बेगातोनी आन्दी? यीशु ओन बहे जवाब हैल्ले सेवोल।

10 पिलातुस ओन इत्तुलः— नाकून जवाब हैल्ले सेवी? पुनवी हैल्ले कि नीकून छोडे कीयाना अनि नीकून सूलीत्-परों तरूहची सीयाना अधिकार नावा कैदे आन्द? 11 यीशु इत्तुलः— ना-परों बहे भी अधिकार आत, अद नीकून परमेश्वरताल पुटत। तेन-हिन्नाल ओना ओंडे जुल्म आन्द बोल नाकून नीवा कैदे सीतुल। 12 पिलातुस इद केन्ची ओन छोडे कीयाले ओंडे भी कोशीश कीया लातुल, पर यहूदीड ओंडे चिचे मासी वंकतुडः— एन छोडे कोकी ते इम्मा कैसर-राजानोल दोस्तनी हैल्ले, 13 बोल राजा आयाना दावा कीयातोल ओल कैसर-राजाना दोस्त हैल्ले। इद केन्ची पिलातुस यीशुन-अरी पसीसी हत्तुल अनि "चबूतरा" पड़ोडा जगाते अदालातना तख्त-परों उदतुल। अद जगाता पड़ोल इब्रानी पासीते "गबथा" आन्द। 14 अद वख्त फसह-तेवहाडा तैयारीता दिया अन्दाज दुपहरी मत्ता। पिलातुस यहूदीडकून इत्तुलः— हूडाट, मीवोल राजाल। 15 ओड़ फड़ा जोर कीसी चिचे मातुडः— जाँक्सी वाटा, जाँक्सी वाटा, सूलीत्-परों तरूहची सीम। पिलातुस ओड़कून इत्तुलः— बड़ांग्, मीवोल राजान सूलीत्-परों तरूहका? फड़ोड याजकोड

\*टीका: "लाल-नीलो दिकडी"—अद मुल्कता रिवाजते वरें राजालोगोड इद रंगता दिकडी करीसी येन्दुड्।

जवाब सीतुड:- मावोल बोले राजाल हैल्ले आयोल, वरौले कैसर-राजाल।  
16 तेन-हिन्नाल पिलातुस यीशुन सूलीत्-परौ तरूहताले ओडा कैदे सीतुल अनि  
ओड ओन येची वोतुड।

17 यीशु तनवा सूली तहची खोपडी पडोडा जगाते अवतुल। अद जगाता पडोल  
इब्रानी पासीते "गल्गथा" आईता। 18 अग्गा ओड ओन सूलीत्-परौ तरूहची  
सीतुड। रंड मुल्जीम्क भी मत्तोड, एडकुन भी ओन-संग् फांसी सीतुड, वोडुल वोडुल  
रंटे खाक अनि यीशु नड्डुमते। 19 पिलातुस दोषपत्र लिखे कीसी सूलीत्-परौ लगे  
कीसूहतुल, तेन परौ लिखे मासी मत्ता:-

"यीशु नासरी यहूदीडोल राजाल"

20 लईसोड यहूदीड इद पत्र पढे मान्दुड बाडीकि शहर्त-करूमता जगा मत्ता  
अनि पत्र इब्रानी लतीनी अनि यूनानी मूटे पासीने लिखे मासी मत्ता। 21 यहूदीडोड  
फडोड याजकोड पिलातुसतुन इत्तुड:- आहुन मिनी लिखे केमा कि "यहूदीडोल  
राजाल", पर ईहन कि "ओल वंकंदुल कि अन्ना यहूदीडोल राजाना आन्दान"।  
22 पिलातुस जवाब सीतुल:- बाहुन लिखे कीतोना आहुन मन्दा सीम्ट।

23 यीशुन सूलीत्-परौ तरूहची सिपाहीड ओना दिकडी येतुड अनि नालुंग  
वाटोंग् कीतुड, वोडुल वोडुल सिपाहीन्-हिन्नाल उन्दी उन्दी हिस्सा। ओना कूडता  
भी येतुड, पर तेना सिलाईता बढे जोड हैल्ले मन्नो, अद पूरो उन्दी ही दिकडी मत्ता।

24 ओड इन्दुड: तान सरूहवट हैल्ले, तान-हिन्नाल चिट्टींग् वाटकट, बोना आसी  
दाल। ईहन शास्त्रता इद मान्दी सच पसीत, कि

"ओड नावा दिकडीनुंग् आपुसते वाटोंग् कीतुड,  
अनि नावा कूडतात्-हिन्नाल चिट्टींग् वाटतुड।"

सिपाहीड ईहने कीतुड।

25 यीशुना सूलीत्-करूम ओना दाई, ओना पेडी, अनि मरयम, क्लोपासना माई,  
अनि मगदालाना मरयम, नालुंगटे नित्ची मत्तांग्। 26 यीशु तनवा दाईन हूडतुल,  
अनि ओनोल प्यारोल चेलाल भी अग्गा हूडतुल, ते दाईन इत्तुल:- ये माईनी, हूडा,  
एल आन्दुल नीवोल मरीं। 27 अनि चेलान इत्तुल:- हूडा, इद आन्द नीवा दाई।  
अन्टीताल ओल चेलाल तनवा रोते मन्दाले दाईन रहची सीतुल।

28 यीशु इंगा पुत्तुल कि शास्त्रना सब मान्दी पूरो आसी हत्ता, तेन-हिन्नाल ओल  
इत्तुल:- येर वडेकतोना। 29 अग्गा सिरका निनतल बरतन मत्ता, ओड बडगाते  
इस्पन्ज दाहची सिरकाते नाहची ओना टाँडदे लगे कीतुड। 30 यीशु सिरका येची  
इत्तुल:- पूरो आसी हत्ता। अनि तला नवीसी जीवा छोडे कीतुल।

31 फसहता तैयारीता दिया मत्ता अनि नाडीता सनीचर्त्-नटी यहूदीडा फडा तेवहारता दिया आयान-हिन्नाल ओड इन्दुड कि मुरदांग् सूलीहक-परों हैल्ले रहे मन्वांग्, अनि ओड पिलातुसना अरदास कीतुड कि काल्कनुंग् उरूहची ओडकुन रहची अलग कीसूहची सीम। 32 सिपाहीड वासी यीशुना रंटे खाकनोड मुल्जीम्कना काल्कनुंग् उरूहतुड। 33 पर यीशुन्-करूम वासी हूडतुड कि एल सासी हत्तोल ते ओना काल्कनुंग् हैल्ले उरूहोड। 34 वोडुल सिपाही यीशुना पसलीते भाला जीतुल अनि पडकने पसलीताल नत्तर अनि येर पसीत।

35 इद इव मान्दींग्ना हूडानवालेना बयान आन्द, कि इम्माट भी बिश्वास कीकीट। इद मान्दी सच आन्द अनि बयान सीयानवाले पुन्दातोल कि सच वंकीतोल। 36 ईहन शास्त्रता भी इद मान्दी पूरो आसी हत कि

“ओना बदे भी हड्डी हैल्ले उरूंगो”।

37 अनि शास्त्रता ओडे मान्दी इद भी आन्द:—

“बोन भाला जीसी तुलेहची सीसी मत्तोड ओन-परों नजर कीयानुड”।

38 अरमतियाहनोल यूसुफ़ यीशुनोल चेलाल मत्तोल पर यहूदीडाल वरीन्दुल अनि तेन्-हिन्नाल बते हैल्ले केवोल कि ओनोल चेलाल आन्दान। एल इंगा यीशुना साता मेन्दुलतुन वीयाना हुकुम पिलातुसनाल तलेहकतुल। 39 पीलातुस हुकुम सीतुल ते ओल वोतुल। निकुदीमुस भी ओन-संग् मत्तोल, एल मुन्ने नरकाता वकत यीशुन्-करूम वासी मत्तोल। एल पचास-एक कीलोंग् खुशबूवाले नी अनि मसाला अरी वातुल। 40 यहूदीडा मिस्साना रीती-रुस्सुम्त्-लेका ओड यीशुना लोथते खुशबूवाले मसाला सोकसी वाटतुड अनि कफ़न-दिकडी दौहतुड। 41 सूलीत्-परों तरूहताना जगात्-करूम बगीचा मत्ता, बगीचात्-रोपा मिस्सान-हिन्नाल नौतो जगा तैयार मत्ता, तान-रोपा बोनै मिस्सी हैल्ले सेवोड। 42 फसह-तेवहारता तैयारीता दियात्-हिन्नाल ओड यीशुन अग्गा इरतुड, बाडीकि करूम मत्ता।

इतवार्त्-नेटी, हफ़ताना एहिलो दिया, दिन हैल्ले पसियो ते मगदालाना  
**20** मरयम मिस्साना जगाते वात, अवता-बरोबर हूडत कि मिस्साना जगाता टॉड्-परोंताल टॉन्गी अलग आसी हता। 2 वित्चीकुन अद शमोन-पतरस अनि दूसरोल चेलान्-करूम अवसी वात, एल ओल चेलाल आन्दुल बोन यीशु खास प्रेम कीन्दुल। अद ओडकुन इत:— मिस्सी सीतोडाम अग्गाटाल प्रभुन टंडसी वोतोड, बेगा इरतोड पन्नोम हैल्ले। 3 पतरस अनि दूसरोल चेलाल पसीसी मिस्साना जगात्-खाक हत्तुड। 4 रंटे वित्ची हन्दुड, पर दूसरोल चेलाल जल्दी वित्ची पतरस्त्-मुन्ने मिस्साना जगा अवसी हत्तुल। 5 नवीसी रोपा हूडतुल ते दिकडींग् अग्गा दीस्तुंग् पर ओल रोपा हैल्ले हन्नोल। 6 इच्चोडे शमोन-पतरस अवसी वातुल, एल मिस्साना जगात्-रोपा सोडीसी हत्तुल, अनि ओल भी दिकडीनुंग् अग्गा

हूडतुल। 7 यीशुना तल्लाडा अंगोचा दिकडींन्-करूम हैल्ले मन्नो, अद लिपटे माता अलग जगाते मत्ता। 8 दूसरोल चेलाल भी, बोल मिस्साना जगाते मुन्ने वासीतोल, एल भी सोडीसी हत्तुल अनि हूडसीकुन बिश्वास कीतुल। 9 अप्पोड-लुगुस ओड शास्त्रता इद मान्दी हैल्ले समझे मायोड कि ओना सासी पिस्सी तेदाना जरूरी आन्द। 10 चेलालोड रोन मलसी हत्तुड।

11 मरयम मिस्साना जगात्-करूम आडनाके रहे मात, आडनाके अद लवीसी मिस्साना जगात्-रोपा हूडत। 12 बड़ांग हूडत, कि पांडरी दिकडी करतोड रंड दूत्क अग्गा उद्दीतोड बेगा यीशुना लोथ मुन्ने मत्ता, बोडूल तल्लात्-खाक, वोडूल कालकना-खाक। 13 एड तान इत्तुड:- ये माईनी, बाडी आडीतोनी? अद ओडकुन इत:- ओड नावोल प्रभून वोतोड, बेगा इरतोड अन्ना हैल्ले पुन्नोन। 14 इच्चो वंकसी अद मलसी यीशुन नित्तोडे हूडत, पर हैल्ले पुन्नो कि यीशु आन्दुल। 15 यीशु तान इत्तुल:- ये माईनी, बाडी आडीतोनी? बोन पिडकीतोनी? अद समझे मात कि एल बगीचातोल माली आन्दुल, ते इत:- श्रीमानजी, इग्गाटाल ओन वोतोनी ते बते कीम बेगा इरतोनी, अन्ना ओन वोईका। 16 यीशु तान इत्तुल:- मरयम। मलसी अद ओन ईब्रानी पार्सीते इत:- रब्बूनी। तेना मतलब "गुरुजी" आन्द। 17 यीशु तान इत्तुल:- नाकुन मिनी इटमा, अन्ना दाऊन्-करूम इंगा-लुगुस हैल्ले तरीयोन, पर इम्मा नावोड भाईड-करूम हन्जी इन कि अन्ना ओन्-करूम मलसी हन्दातोना, बोल नावोल अनि मीवोल दाऊ आन्दुल, नावोल अनि मीवोल परमेश्वर आन्दुल। 18 मरयम मगदालीनी हन्जी चेलालोडकुन वेहची सीत कि अन्ना प्रभून हूडतोना अनि ओल नाकुन ईहून ईहून मान्दी वंकतोल।

19 अद्दे इतवार्त्-नेटी नुल्पेता वकत यहूदीडा वरेंत्-हिन्नाल रोता किवार्क बन्द कीसी चेलालोड इकट्टो मत्तोड अनि यीशु ओड-नड्डूम वासी नित्तुल अनि ओडकुन इत्तुल:- मीकुन शान्ति आई। 20 अद इन्जी ओल ओडकुन कैक अनि पसली दीसूहतुल, अनि चेलालोड प्रभून हूडसी वाको खुश आसी हत्तुड। 21 यीशु ओडे इत्तुल:- मीकुन शान्ति आई, - बाहुन दाऊ नाकुन रौहतुल आहुन अन्ना मीकुन रौहतातोना। 22 अनि ओल ओडकुन उहूकसी इत्तुल:-

मीवा जीवाते पवित्र आत्मा येनाट -

23 बोडा पाप्क माफ़ कीयातोडीट ओडा पाप्क माफ़ आन्दुंग्,  
बोडा पाप्क माफ़ हैल्ले केवीट ओडा पाप्क माफ़ हैल्ले आयोंग्।

24 चेलालोडा नड्डूमतोल थोमा-येमाल यीशुना आहुन वायाना वकत ओड-संग् हैल्ले मन्नोल। 25 चेलालोड थोमान वेहची सीतुड:- प्रभून हूडतोडाम। थोमा ओडकुन इत्तुल:- ओना कैकने कीलोंगना चिन्ह हैल्ले हूडोन अनि विरिन्ज हैल्ले वाटोन, अनि ओना पसलीते नावा कै हैल्ले वाटोन, अप्पोड-लुगुस बिश्वास हैल्ले केवोन।

26 हफ़ता-मेंड आसी हत अनि चेलालोड़ रोते ओंडे इकट्टो आतुड़ अनि थोमा भी ओड़-संग् मत्तोल। किवार्कना तालांग् लगे मातुंग् पर यीशु ओड़-नड्डुम वासी इत्तुलः— मीकुन शान्ति आई। 27 अनि ओल थोमान इत्तुलः— विरिन्ज इग्गा वाटसी नावा कैकनुंग् हूड़ा, कै इग्गा कीसी नावा पसलीते वाटा। सन्देह मिनी केमा, बिश्वास कीम। 28 थोमा जवाब सीसी इत्तुलः— ये नावोल प्रभुनी, नावोल परमेश्वरनी। 29 यीशु ओन इत्तुलः—

नाकुन हूड़सी बिश्वास कीयातोनी? -

नाकुन हैल्ले हूड़ोड़ अनि भी बिश्वास कीयातोड़

ओड़कुन बरकत आन्द।

30 चेलालोड़ा सामनो यीशु ओंडे वल्लेसोंग् अद्भुत चिन्ह दीसूहची सीतुल, इद पोथीते इव सब हैल्ले लिखे मायोंग्। 31 पर इच्चोंग् लिखे मातांग् कि इम्माट बिश्वास कीकीट कि मसीह, परमेश्वरतोल मरीं, यीशु ही आन्दुल अनि कि ओन-परों ईहुन बिश्वास कीसी मीकुन जीवन पुटसी दल।

तेन-पिज्जा यीशु तिबीरियास पड़ोडा समुन्दर्त्-करूम चेलालोड़कुन-  
**21** हिन्नाल तन्वातुन ओंडे दीसूहतुल। इद ईहुन आसी हतः—

2 शमोन-पतरस, थोमा-येमाल, गलीलदेशता काना नाटेनोल नतनएल, जबदीनोड़ मर्क, अनि ओंडे रंड चेलालोड़, एड़ सब अग्गा मत्तोड़। 3 शमोन-पतरस ओड़कुन इत्तुलः— मीन्क बैईले दाका। ओड़ ओन इत्तुड़ः— अम्माट भी दाकोम। डॉन्गाते पसीसी हत्तुड़ पर नरका-पड़ेंग बड़ांगे हैल्ले बैयोड़। 4 दिन पसीनाके यीशु किनाड-परों नित्ची दीस्तुल, पर चेलालोड़ पुन्नोड़ हैले कि यीशुआन्दुल। 5 ओल ओड़कुन इत्तुलः— ये दोस्तकनीट, बड़ांगे बैसी येतोड़ीट? ओड़ जवाब सीतुड़ः— बड़ांगे हैल्ले। 6 ओल इत्तुलः— जेवनो खाक जाल वाटसी सीम्ट ते पुटसी दल। आहुन ओड़ जाल वाटसी सीतुड़ अनि इच्चोंग् मीन्क वातुंग् कि जाल वीन्जाना हैल्ले बने मायो। 7 यीशु खास प्रेम कीन्दुल ओल चेलाल पतरसतुन इत्तुलः— एल तो प्रभु आन्दुल। शमोन-पतरस काम्त्-हिन्नाल दिकड़ी रेहची मत्तोल, इद केन्ची कि प्रभु आन्दुल ओल नन्नीने दिकड़ी दौहची समुन्दरते डाईसी हत्तुल। 8 दूसरोड़ चेलालोड़ मीन्क निन्ता जाल वीन्जनाके डॉन्गाते किनारो अवतुड़, बड़ीकि धरतीताल अन्दाजन सौ मीटर लक मत्तोड़। 9 डॉन्गाटाल रगसी कोयलाता किस अनि किस्त-परों मीन हूड़तुड़, अनि साड़ी भी। 10 यीशु ओड़कुन इत्तुलः— इंगा बैइतोड़ीट अच्चेनाल मीन्क तड़ाट। 11 शमोन-पतरस डॉन्गाते तरगसी जालतुन धरतीत्-परों वीन्जतुल, जालते उन्दी नूर अनि त्रेपन फ़ड़ा मीन्क निन्ची मत्तांग् फिर भी जाल हैल्ले सरों। 12 यीशु ओड़कुन इत्तुलः— वड़ाट, तिन्जी येनाट। बोले चेलाल पूछे कीयाना हिम्मत भी हैल्ले केवोल, कि इम्मा बोनी? बाड़ीकि पुन्दुड़ कि

एल प्रभु आन्दुल। 13 यीशु साडी येची ओड़-करूम हन्जी सीतुल, अनि मीन्क भी सीतुल। 14 यीशुना सासी पिस्सी तेदान्-पिज्जा इद तीसरो मेला मत्ता कि ओल चेलालोड़कून मिले मातुल।

15 तिन्जी येची मत्तोड़ अनि यीशु शमोन-पतरसतुन इत्तुल:— ये शीमोन, यूहन्नानोल मरीनी, एड़कूनसे मईसी बड़ांग् इम्मा नाकून प्रेम कीयातोनी? ओल ओन इत्तुल:— इंगी प्रभुनी, इम्मा पुन्दातोनी कि नीकून प्रेम कीयातोना। यीशु ओन इत्तुल:— नावा भेंडालोड़ा पिल्लानुंग् केपा\*।

16 दूसरो मेला यीशु शमोनतुन इत्तुल:— ये शीमोन, यूहन्नानोल मरीनी, बड़ांग् इम्मा नाकून प्रेम कीयातोनी? ओल ओन इत्तुल:— इंगी प्रभुनी, इम्मा पुन्दातोनी कि नीकून प्रेम कीयातोना। यीशु ओन इत्तुल:— नावा भेंडालोड़कून केपा\*।

17 तीसरो मेला यीशु पूछे कीतुल:— ये शीमोन, यूहन्नानोल मरीनी, बड़ांग् नीकून ना-हिन्नाल प्रेम आन्द? पतरस उदास आतुल कि यीशु मून्द मेलांग् इहन पूछे कीतुल कि बड़ांग् इम्मा नाकून प्रेम कीयातोनी? ओल इत्तुल:— ये प्रभुनी, इम्मा सब मान्दी पुन्दातोनी, पुत्तोनी कि नीकून प्रेम कीयातोना।

18 यीशु जवाब सीतुल:— नावा भेंडालोड़कून केपा\*।

अन्ना नीकून सच सच इन्दातोना,

जवान मत्तोनी अनि नन्नी दौहची

बेगा हन्दा वसन्द अग्गा ताकसी हन्दी,

पर सिहानो आसी दाकी

अनि कैकनुंग् तारसी सीकी, अनि दूसरोल नीवा नन्नी दौहची सीयानुल।

अनि बेगा हन्दा हैल्ले वस्सो अग्गा नीकून वोयानुड।

19 ईहन इन्जी यीशु वेहन्दुल कि पतरस बातल मौतते सासी परमेश्वरता महिमा वेहची सीयानुल। तेन-पिज्जा यीशु ओन इत्तुल:— इम्मा नावोल चेलानी मन।

20 पतरस मलसी यीशुनोल प्यारोल चेलान वानाके हूड़तुल — एल ओले आन्दुल नरुपेता जावाता वकत यीशुन्-करूम उदसी मत्तोल अनि पूछे कीसी मत्तोल कि ये प्रभुनी, बोल नीकून बैसूहतानुल? 21 एन हूड़सी पतरस|यीशुन इत्तुल:—ये प्रभुनी, एना बड़ांग् आसी दल? 22 यीशु इत्तुल:— नावा मरजी आईवल कि एल नावा मलसी वायान-लगुस मन्दानुल, ते तानसे नीवा बड़ांग्-आईवल? इम्मा तो नावोल चेलानी मन। 23 यीशुनोड़ चेलालोड़ा-नडडम इद मान्दी फैले मासी हत कि

\*टीका: "भेंडालोड़ा पिल्लानुंग्" अनि "भेंडालोड़" — यीशु ईहन तनवोड़ बिश्वास कीयानवालेड़ा मन्डलीता मान्दी कीयातोल। अद जमानाते इद प्रेम दीसूहताना मान्दी मत्ता।



एल चेलाल हैल्ले सायोल। पर यीशु ईहन हैल्ले इन्नोल कि हैल्ले सायोल, पर ईहन कि नावा ईहन मरजी आइवल कि नावा वायान-लुगुस मन्दानुल ते नीवा बड़ांग् आईवल?

24 एल ओले चेलाल आन्दुल बोल इव मान्दिगना बयान सीयातोल, अनि इवेनुंग् लिखे भी कीतोल; अम्माट पुन्दातोड़ाम कि ओना बयान सच्चो आन्द।

25 यीशु वल्ले ओंडे काम्क कीतुल, इव सब उन्दी उन्दी कीसी लिखे माईवांग् ते इच्चोंग् पोथींग् आईवांग् कि दुनियाते अब्बेन्-हिन्नाल जगा हैल्ले आयो।